

7650-7651





永樂大典卷之七千六百五十



黃

黃任道

宋楊傑無為集行狀 府君諱某字任道其先江夏人遭唐末之亂其族分適江南西蜀惟建安浦城為著姓雖爵

位無顯而其文章行義多見稱于時曾祖元吉初以風雅名重江南任非其志儒學傳家二子入本朝皆登進士第次子覺任殿中丞以清直聞當時儒宗如宋宣獻楊劉二內相多與唱酬措紳傳之君之祖也考潛山先生兩舉進士不利于春官朝廷當推恩奏名而隱居求志不願就其歌詠翰墨有晉唐風格累贈朝奉郎世積令德篤生府君府君為兒童時才識已過人及其長力學有文行為韓魏公王荆公歐陽公深所器重皇祐五年進士及第調揚州天長主簿移恩州清河令秩滿改著作佐郎知曹州濟陰縣神宗皇帝登極覃恩遷秘書丞以廣濟河決免一官魏公留守魏都薦君學行乞教授北京國子命將下丁潛山先生憂繼丁母裴氏壽安縣太君憂執喪盡禮兄弟友愛閨門肅雍士君子推以為法制終再授秘



書丞監都進奏院。召對除河北東路提舉常平倉。就改本路轉運判官。旋易西路。就移陝府西路提點秦鳳等路刑獄。被召赴闕。未行。坐舉官失。當再奪秘書丞。會更官制。授奉議郎。入尚書省。任職方員外郎。車駕幸省。遷承議郎。改五品服。久之以廩稍不足。乞補外。乃知汝州。今天子即位。恩遷朝奉郎。若足疾。求致仕。元豐八年十二月四日卒于官舍。享年六十有五。先是一夕夢白雞棲于牀下。語家人曰。昔謝安夢白鷄而死。我以辛酉歲生。豈吉祥耶。果不起其疾。娶某氏。追封永安縣君。再娶章氏。封武寧縣君。三子。曰材。太廟齋郎。曰樞。曰杞。皆郊社齋郎。二女。長適奉議郎王績。次在室。恩州之清河清陽。欠黃河埽岸芟草十四萬。兩縣於隊長十九戶下催理。都水漕臺文移不絕。十九戶貧乏。六年不能供。前後長少鞭打不勝數。蓋當時隊長以丁數選。非以物產定故爾。郡縣苦之。人莫敢議。君乃言於朝。曰。嘉祐之初。河入恩州。故埽岸芟草出於民者萬數。今則聚而無用。條其可免之十利。朝廷可其奏。悉蠲之。魏公方執政。尤稱其事。初朝廷置寬恤民力司。諸道遣使求民瘼。有曰河朔館驛宜罷。須索以寬其役。君以謂河北中路傳驛。歲有遽使往來。邊防休戚之所繫。百須皆出於民。當令百姓明其所出物數。折除春夫丁役。及於二稅合納之物。量數放免。民自樂輸。

矣。朝廷從其議。至今民以為利。君在濟陰。當廣濟河決。危急。邑人將就墜溺。老幼號訴。君采輿議。乃決南堤。以分水勢。不意浸鄰田。論法至重。君自以長不忍貽過於下。一皆引伏。當時魏公。吳正憲公。御史中丞。文章論列。以為誠心愛民。非有害彼之意。譬如逐盜出境。盜為他境之害。非逐盜者之罪也。曹州寃。自知縣張復禮。亦乞納官以贖其罪。竟得未減。而濟陰之民。世世不忘其德。至神宗朝。召對。上曰。卿即某耶。昔日濟陰之事。意恤民。慰勞之甚厚。君稱謝。因請上留意史書。上悅。聽納。時貴人有不喜君者。君為提舉官。時郡縣多不曉朝廷愛民之意。過為苛刻。君務為便民。司農官以為沮法。賴正憲辨明。得免斥逐。君議賑濟之術。均以一路當散糧斛之數。隨郡縣豐凶。戶口多寡。增損以給民。全活者衆矣。河北方水災。米粟踴貴。市易糶官。又增價以斂之。民益艱食。人不敢言。君曰。視民困苦而不救。非我志也。遂奏罷之。鳳州有獄久不決。而苦愆亢。君親往決之。是夕雨澤霑足。人以謂雨自公致也。君孝於事親。友愛諸弟。自少文學聲名。藹于士林。識度高遠。議論嚴正。耻為阿諛。取悅於人。其文章翰墨。為世推重。文集四十卷。可見其志也。其為守令。奉使。惟務愛民。以報朝廷。大臣屢薦。以臺閣侍從。而其命數奇。士論惜之。平生愷悌。與朋友交。久而益固。未嘗遽言。



人短而多稱揚人之所長。勇於信義。廉於進取。毅然有古人之風。某久游門下。知行義爲最詳。紀述善美。不敢以誣。謹狀。

## 黃仲熊

宋黃庭堅豫章集墓銘 非熊豫章黃氏。仲熊其名。非熊其字也。先大夫之幼子。以至和歲乙未月乙酉日丙申時

辛未生於臨菑。先大夫以歲月日時參伍以曆象爲吉祥。以爲門戶所寄。兒時黥黑脂肥。甚可念。先大夫捐館舍於康州。非熊方四歲。爲其幼孤。太夫人不忍以嚴治之。故非熊知學最晚。然性質豪舉。落筆成文。不肯爲人下。於儒生藝事。無所不學。雖不造微要。皆畧能也。家貧。嫁四女弟。以故兄弟例婚晚。伯氏元明賣大父時田。爲非熊娶舒城趙氏。婚禮成而非熊不悅。棄去。由是頗浮沉於酒。中亦自恃其命。曰。我生日在申辰。在卯歲庚午天地合。我終富貴得意婚大家。於是自強。屏酒不游。刻苦琢磨。欲以怪奇鉤致祿仕。久之宗室汝州防禦使仲爰聞其家世。欲以女予之。而非熊不幸病死矣。得年三十有六。有銜不祛。此日者誤之也。嗚呼。非熊欲仕而不偶。難婚而無後。孤先大夫之心。予兄弟執其咎。無所歸怨。維其不壽。

## 黃得禮

宋黃次岑三餘集先大夫述 先考諱得禮。字執中。洪州豐城黃氏。九歲喪母。十四游太學。二十五中元祐三年進

士第。嘗爲鼎州桃源縣尉。虔州興國縣令。柳州軍事推官。以沒。其在桃源捕獲強盜。大情已正。格當被賞。歎曰。豈可便文自利。而以疑似殺人哉。盡釋之。虔民健訟。諸邑狂獄充斥。其在興國三年。瘦死者纔一人。猶以爲恨。建中靖國初。應詔上書。論行法任人之要。其略曰。嘉祐熙寧之法。仁祖神宗之爲也。祖宗所以望其子孫者。在安治之如何。不在政事之因革。而主熙寧之說者。曰。必爲之更變。主嘉祐之說者。曰。必爲之守常。分曹爲朋。迭立勝負。宿怨快於私門。實禍歸於公家。朝廷顧何所賴。惟天子建中和之極。正心誠意。擇其善者而增損用之。則行法之要也。人才實難。有未必用。自賢良進士。砥名厲節。以自致於大臣公卿之選。益又難矣。國論異同。口語疑似。無四凶之罪。而加以流竄之刑。瘴霧蠻煙。不死不已。遺孤旅櫬。雖死不還。士有持平守正。如彭汝礪。葉濤之徒。其言未必見省。此風不革。異日必有以伏刑都市。參夷伍宗之請。聞于上者矣。願朝廷退人以禮。宰輔爲國受言。變措紳鍤薄之風。增社稷靈長之福。則任人之要也。書入報聞。先考年不及強仕。位不及京官。平昔詩文。遭亂散落。言論風旨。可擊見者。懼復湮沒。故追次其略。而不敢輒加焉。



# 黃瓌

宋曹彥約昌谷集黃公墓誌銘 通判公墓有誌銘 太府寺丞 灑以族人之誼許論譏矣會寺丞選漕廣右詔趣行甚亟秉筆

未竟而通判公之葬卜日已定其勢不能走數千里介以請乃俾某述其 大畧先納諸壙按南康軍都昌縣土塘黃氏分派于江州湖口縣之沙谿 自沙而下至通判公纔六世其族蕃衍星居兩郡者不下十族多者輒數 十家而土塘之族號為最盛則公高祖居士拱實啓之也居士居鄉有盛 德貲財百萬漫不以加意賑窮恤乏無所不盡其力後又做釋氏之說作 龍花會以召天下信士聞風而來無不滿意傾囷倒廩不計也人皆以居 士稱之至于今未改生子寔能世其業號小居士為土塘族祖小居士生 子可累薦試春官不第教子詩禮不使為科舉碌碌計後贈朝散大夫大夫生 汀州使君武汀州生通判公公諱瓌字少蘇又字繼蘇汀州之長子也母 封氏封太恭人初汀州有四方志以奇節自許當建炎中興初投匭論兩 河事宜召問中書即布衣授招討司幹辦贊大名軍與平劇賊田知古招 泲州叛人王江等有奇功薦于朝未報去之會李成寇江州得自外奮入 圍城又告急行在所見謂過計及遣兵往救不及事朝廷肝食乃上書論 軍國利害對執政慷慨憤發為時論所服高宗奇其才授承務郎知黃州

黃岡縣歷婺州義烏縣丞擢知郴州又知汀州與秦丞相不合奉祠十餘 年不為屈通判公初受遺澤中乾道七年銓選調德安府孝感縣主簿秩 滿調光化軍司理叅軍以薦者改宣教郎知江州德安縣通判江陵府丁 太恭人憂服闋授潮州通判未赴以疾自請得主管台州崇道觀嘉泰二 年十二月己未卒于家享年六十有七官至朝奉郎公賦性簡淡不事表 裸事父母為令子處諸弟為賢昆與人交和易平直人不知其有立遇事耿 耿勢位不能奪當官治民一意不擾鴈鴛行不以為便思有以撓之不可 得也孝感本無職業惟奉諸臺差檄未嘗少暇以刻刷錢糧委之輒不稱 意至剖決獄訟予奪產業則皆服其寬平莫能加損在光化四年未嘗以 陞改介意貴游子弟恃陰撓政守以下皆避其鋒公執法正授書不為少 屈大家豪奪民田莫辨其偽公視印文不合上其姦狀闔郡嗟異舊城在 漢水北與虜界錯居得闌入愚民即欲置地公言此皆中原赤子非姦細 不可殺獄遲久不上遂得未減累政皆信其賢爭推薦之今資政殿大學 士趙公彥逾總餉湖廣知其舉將溢格猶以公名刻上且曰吾寧瓌一舉 削不可失一賢者故工部侍郎顏公度為轉運副使以收拾孤寒自許時 連歲不擢職司部內有常負皆不得磨勘顏公初入境意已屬公公受代



即辭去。無顧望色。顏公亟薦之。德安新減民租。會一歲乏供。數且萬緡。公下車適遭其逢。用度不給。州家循習。泛敷迫使取諸民。不肯奉命。曹掾官有所誅求。又不供億。姑含怒媒孽。欲連坐佐貳。公言此知縣罪。不當旁及廣座。肆言無所畏避。邑民亦誦言不可。勢未敢發。遣郡吏物色帑藏。無一毫私意。俸祿外餐錢。未嘗以例取。其計遂屈。顧已撤入郡郭。不可中輟。俾攝事僉幕。以便郡政。佐貳理邑事。眎州家風旨。敲朴深入骨髓。宜治辦井井。反不如前時。邑民走諸臺。願終得黃佛子乃已。州家始不自安。乃還舊物。大資政趙公師蜀召還。過郡得其事。津津有喜色。又貽書縱吏之。且言堅忍以事上官。盡力以恤百姓。舉賢如此。可以無負。在邑幾五年。終始如一。旁觀若不满意。後有改其涂轍。立致禍敗。公論亦且不與。好學未嘗廢簡冊。適意即自賦詩。不可強也。平居安坐靜室。不以世俗事介意。戶庭之外。至旬月不一出。所居州縣。守令有滿去。不得一見。遇賓客契合。飲酒奕棋。陶然自得。真樂於接物者。官滿俸輒盡。無求田問舍意。往來都昌湖口間。或寓南康城下。惟意所欲。娶曹氏。實彥約之姑。子男三人。渭。溱。洎。皆能有立。渭嘗以鄉老獻書登于天府。女三人。長適同官子蔣摯。文雅有賢譽。次適彥約。其次則彥約弟彥繼。孫男六人。抱棟。櫛。檣。女八人。皆未有所適。愛有不可已。如其表墓。以俟君子。

## 黃中美

宋朱晦庵大全集朝議大夫致仕贈光祿大夫黃公神道碑 宣和之末。國家承平百有餘年。中外無事。乃有二

弄臣竊國大柄。建取燕雲。以召非常之變。有識之士。已私憂之。而衆莫之覺也。捷書日聞。官吏相慶。獨信德府司錄事邵武黃公有憂色。人問其故。公蹙然曰。太平日久。軍旅遽興。廩無蕪歲之儲。不取於民。將何以濟。顧今歲荐饑。民死無數。况河北天下根本。又可重困之邪。聞者莫不笑之。俄而河北盜賊果蠱起。信德城守屢危。金虜乘之。遂不能支。官吏相與匍匐拜降。唯恐居後。而公獨奮然誓死不屈。虜既入城。放兵四出。有挺刃脅公以降者。公顧左右。踣之而逸。變姓名匿里巷中。虜退乃出。則先降者皆已抵罪。而宣撫使獨奇公節。俾行府事。公亦撫摩瘡痍。期復按堵。未幾以內禪



轉朝議大夫。則以資高不當復屈佐郡而省罷以歸矣。靖康元年。還次京師。遭圍城之變。而明年欽宗出幸虜營。虜遂以兵威脅城中。擁張邦昌而立之。一時公卿繇千百數。相顧俛首。唯唯聽命。公獨感憤。義不辱身。即日移檄致其事而去。蓋當是時不約而去此者亦四十人。然不數日而公竟以病卒矣。二年二月丙子也。嗚呼。祖宗百年禮義廉耻之化。其所以涵養斯人者。可謂至深遠矣。夫以熙寧以來。群小相師。滅理窮欲。以迷于茲。適已六十年矣。士大夫酣豢之餘。心志潰爛。不可收拾。宜其禍變危迫而皆不知以爲憂。敗衄迎降而皆不知以爲耻。棄君叛父。奉賊稱臣。而皆不知以爲辱也。而猶復有如公等者。出於其間。是雖人之秉彝不容泯滅。然而祖宗所以涵養斯人至深且遠者。亦豈不於此而少見遺餘哉。公卒時年始六十有三。夫人林氏。携挈諸孤。奉公之柩。崎嶇兵火亂離之中。川陸五年。乃能達於故里。紹興乙丑之歲。然後始克葬焉。而公之子永存。浸以材能有聞於世。上聞其名。召以爲尚書郎軍器監。出爲淮南轉運副使。俾修農戰之業。以爲北向之漸。前後贈公至光祿大夫。而夫人自公時已封宜人。又以子貴屢逢慶恩。得賜冠帔。累封至始興郡太夫人。淳熙乙未八月五日。年九十七而薨。又以郊恩贈蘄春郡夫人。而副使歸自淮南。則使人以

同郡徐君復之狀來。謂新安朱熹曰。吾先君之德如是。而葬久未銘。且先夫人率履持家。克享上壽。世鮮及之。亦當得附先君遺事。以垂後世。子其圖之。熹受書考之。其得光祿大夫蘄春夫人行事本末。歎息久之。因論其大者如此。并記其州里世次。閱公之先自潮入閩。居建之浦城。徙紹武。始別於建。遂爲郡人焉。曾大父夢臣。大父局。皆有隱行。至公父蒙始舉進士。後贈中奉大夫。中奉娶施氏。生公七年而卒。後贈令人。中奉沒時。公年甫冠。勵志爲學。而貧不能得書。常假於人以讀。率一再過而歸之。則已成誦而不忘矣。中元祐九年進士第。調真定府左司理參軍。知邢州平鄉縣。皆善其職。以守止不阿上官罷退。久之貧甚。不以爲意。親友強起之。乃更調鎮西軍節度推官。郡鄰極邊。守城武將。視法令僚屬蔑如也。公不爲撓。事有不可。必庭辯之。守愧屈焉。改宣德郎。知濟州衛縣。令縣民有被誣殺人者。公察其寃。縱之。同列有害公者。謂公故出死罪。守疑之。公不恤也。後河決敗數郡。詔諸令長各護丁夫。疏鑿隄障。縣獨不擾而集。以功轉奉議郎。除河北都轉運司屬官。北京留守。辟以爲真定府錄事。是時河北連歲不登。民多相聚爲盜。而郡守歡燕教逸如平時。公獨憂之。每當集輒辭不與。守問其故。公對以實。守默然不說。於是乃移信德而遂去。以卒焉。其爲



人坦易。不事邊幅。而與人交必以誠。當官不為赫赫之名。而於事細微無不謹。旁郡有疑獄。部刺史多奏以屬公。往往得其情。樂施予。不問識否。人雖負之不悔。有求輒復。周之。在鎮時。府丞陳紹夫死。公以俸錢遣其喪。女先寡居。迎養三十年。始終如一。日。故人有通貴者。招致之。謝不往。都轉運使呂公頤浩。及他使者多知其材。欲薦之。未果而竟沒。論者惜之。公初娶宛句劉氏。贈和義郡夫人。蘄春其繼室也。延平人。贈少師積之女。夫人渾厚靜專。歸黃公甚貧。處之自若。晚雖豐泰。亦未嘗改其度也。事公之女兄如姑。公之沒而歸其喪。教其子。務以忠言直節立其志。使卒為聞人。以大其家。歲幾滿百。而神明不耗。起居不衰。又似有道者。家人百口。撫之以慈愛。而教告勉飾隨之。未嘗見其有嚴厲之色。而中外整整。莫敢越軌度。鄉黨傳以為法。公葬邵武縣仁澤鄉寶隆山之源。夫人葬永城鄉黃溪保銅青上下相距蓋十里。子男五人。曰端愿。端平。皆有俊才。牛角已與薦送而皆早卒。次端方亦卒。次永存。今為朝請大夫。主管武夷山冲佑觀。次永平。右儒林郎知靜江府理定縣。亦先卒。女五人。其婿宣德郎朱康年。保義郎朱侑。修職郎趙舜臣。通直郎杜鐸。進士李先之也。孫男十人。龜朋儒林郎格。鉞南卿。範。摠。勛。夏。欽。鈞。皆未仕。而格。鉞。欽。亡矣。孫女六人。其婿周敦善。

李龍。李徽。將仕郎吳時萬。上官珪。上官揚。曾孫十七人。大正大時。大椿。大全。大猷。大學。大昌。大淵。大缺。大聲。大韶。大受。大嚴。大任。大用。餘未名。女十四人。其婿任斗南。林杞。李价。餘尚幼。玄孫男六人。公振。公升。公顯。公回。公煥。公章。嗚呼。是亦盛矣。黃氏之昌。阜於世也。其可量哉。銘曰。暨暨黃公。逢時之危。跡隨眾兆。思屬眇微。之死弗汚。以全其歸。温温夫人。克相其夫。又詔其子。以成厥家。壽考尊榮。百歲而徂。寶隆之阿。黃溪之里。東西相望。兩闕對起。子孫盈前。曾玄滿後。尚有寵臨。不遠來又。

## 黃永存

宋何澹小山雜著黃公墓誌銘 淳熙九年夏。某以祕書郎攝工部。與紹武黃公永存攝左曹。蜀人范仲藝攝禮部。

並命。黃公折輩。行相交。晚節歸休。士類傾鄉。其守三山時。得相聞。踰兩年而哭其訃。其子龜朋以狀來請曰。吾先君子以忠孝自厲。生平無虧。宜有以詔後。同廊之契。存者惟公。其無遜。公字堅叟。其先光州固始人。唐末惟淡者入閩。家紹武。以五經分授子。號黃五經。生知良。宰信州貴縣。六傳而至公。曾祖高。咸有隱德。高生蒙。以文鳴于鄉。贈中奉大夫。生公父中美。登元祐九年進士第。終左朝議大夫。以公贈開府儀同三司。曾祖妣危氏。祖妣



施氏贈令人。妣林氏贈少師延平積之女。封始興郡太夫人。贈昌國夫人。公以廕補官。紹興初。尉虔州信豐。年方弱冠。邑瀕廣多盜。日厲弓兵督捕。請于郡。得駐大軍三百。循州戍將叛。卒中夜奄至。殺二隊。將公與統制官逆戰于市。大破之。邑人德公。繪象以祀。旋捕逐饒十閑等二千餘人。寇自是不入境。奏功第賞。循從事郎。訓詞有奮身不顧。臨鋒剋敵之語。聞者狀之。秩滿。以親老丐祠。久之。調饒州判官。守皆加敬。遇旱。履畝檢校。戶無異詞。勢家不得免。聞于郡。公請詰諸田鄰。乃屈服。諸司交薦。改宣義郎。知信州鉛山縣。俗囂于訟。曰首禁過呼。訟者悉呼宣義。公喜白母曰。邑人相信矣。屬精剗。公庭晝閒。縣有寨五。人戶歲輸一石。則秋糶五斗以贖。直未始償也。公為申請蠲減。且廢巡鹽一寨。縣計遂足。歲歉。黥徒數百。嘯聚發廩。巡尉遣兵督捕。公適燕僚佐。亟追回。密鏤榜委他官。馳諭。悉感泣散去。事定。收首惡三四輩。赴部。流配之。邑賴以全。人服其善。應變。家呼公為宣義。後昭武人過縣。必問宣義安否。先是催科無法。戶長告病。公易以田帖。十日一校。民自樂輸。去二十九年。百姓磨崖為善政碑以記。尤後人之更改也。事具永平志。其差役尤盡善。人爭先應治。有古循吏風。諸臺以聞。除諸軍糧料院。公喜誦節用愛人之句。去縣有一年。儲會有言。前鄱陽守者。波及

愈廳。遂以祠去。日奉親為樂。無官遊意。邑人端明黃公中為春官。言諸時宰。除倅潭州。紫微張公孝祥為帥。自恐以敏失事。囑公正救。公樂為之盡忠義。寨姓莫者。欲擁兵官莫延廩為變。延廩持節南丹州之弟也。事覺。十八人斫寨門遁。明日禽至其六。公請亟誅罪首。餘勿問。郡以正恐。旋徙延廩他郡。張公欲論薦公。以除漕夔路。先是嘗詔舉廣西憲葉公顯。魏公杞以公應詔。至是二公實當國。給舍繩以格法。繼命堂審乾道四年。陞對。孝宗問米運常平。及長沙軍政。對甚悉。退語輔臣黃某。疏通。可任邊寄。除知蘄州。陞辭。未及敷奏。上曰。欲卿措置訓兵積穀耳。因乞行縣。上曰。春時勸農。便可出。因問疾苦。卿必能稱職。公至郡。則前所奏住修城池關隘。免起木筏等事。悉施行矣。公首懲輸納斛面之弊。招流移耕墾。閱民兵節費。得贏鏹五萬。名備邊庫。以聞。詔守臣不得妄支。六年。再任漕臣。呂企中滋長小人。公抗辯不勝。罷歸。恬不介意。創茅葺圃。侍版輿從容。自號退圃居士。丞相虞公嘗識公姓名于篋。起知通州。太夫人以淳熙二年棄養。年九十七。公性至孝。老人食多噎。躬進匕箸。夜視床褥。始退。每宿疾作。親滌溷穢。以授妾御。俾無厭憚。執喪尤盡禮。服除。知嚴州。對陳足兵食豐財。冗官風俗等五事。改温州。九年。賜對。延和時。上憂早。公因進布種。遲麥法。喜曰。官



中亦種甚佳。惟小麥可耳。卿議論詳明。當留爲職事官。次奏外官臨替妄費。貽後之患。上曰。節用猶不足。矧妄費乎。卿貫何所。以闕對。無聞音。何也。曰。先臣游宦。臣實生于河朔。所陳皆開納。翌日諭輔臣黃某老成重厚。全是北人。留他日護客。遂除大理正。旋兼左曹。上曰。左曹民頌多。黃某三十年前作縣。宜諳練。繼遷官終不徙。輪對復陳刑獄詭挾差役等弊。口奏軍政宗室添差。上大喜。又言板曹置之。宜少貸內帑。上曰。名貸。曷嘗還乎。上何貸二十萬人。謂上意向公矣。給舍有言闕郎者。上曰。黃某無得好。當更除一二老成。遂召周頡趙公廙與公並命。公在左曹。事越拘攣。符下諸處。必分割其曲直。吏不容欺。亦毋得市息。訟者獲伸。有踴躍于部門者。廼今知有省部。蕪湖張次對有遺言。盡捐其產與幼弟。他房興訟。二十年不決。公判其牘。感以孝義。語皆激切。乃合詞請守前約。朝論翕然。異日訓詞有儒雅飾吏之語。詞臣謂公蓋指張訟。十年夏旱。求言。公不務大言。直述關本職者六事。蠲都城柴薪等稅。免僧道六十以上丁錢。官戶不許請佃。住招軍以寬民力等事。疏入。首施行。無刑部度支。兩月間。斷諸州大辟四十餘。鄭興裔自防禦轉廉車。奏所給辭多就寡。公疑焉。乃其前任嘗以內降給真俸。公檄問曰。此乃辭寡就多也。鄭愧服。會除帥淮東。言者斥其欺。罷

之。十一月。除軍器監。上留意淮西屯田。集卿監郎官議。公言便。知和州。施溫舒亦嘗有請。詔各條具。公言。廬和無爲有舊迹。可行。勿利所入。三年始給耕兵。然後以十分爲率。歲收其一。至五分而止。詔可。異日上語溫舒屯田。惟卿與黃某爲然。溫舒因奏。公誠實可任。明年二月。除漕淮西。臨遣。上曰。送迎北客。當召奏。屯田久則有利。郭杲行於襄陽。已就緒。郭剛見行於和州。上曰。郭剛老成。但不甚識字。公曰。若曰勤。何必識字。其人守法。作州日。人號郭法司。上以爲然。因論吏贅負兵冗食。及前在左曹三事。復論北事及河南荒蕪。上曰。河北近亦不甚經理。公奏老胡諸子不相下。有亂證。願飭武備。以俟天時。又奏士大夫不爲久慮。只錢會一事。久必弊。上曰。惟少印爲是。因乞並江海處。盡用鐵錢。以杜滲漏。上是之。令至郡有便宜。即奏。未幾有旨。相視黃州蜀士競稅利害。公請就試者免徭二千緡。外此勿免。上稱善。迄今爲定法。公私兩便。繼相視修築巢縣城。公以城南邊江。可泊舟。乞補治南壁。而以池軍運甓。捐三千緡。犒勞客舟。得無擾。汭淮多楫。負至者。廬帥王希呂不受。公乞隨宜收留。繼奏和州開墾次第。守臣錢之望入奏。上問狀。對秋可倍收。悅曰。無人任責。惟黃某耳。後數月。之望復對。上曰。卿向與黃某合宜。同措置。翌日命以公知揚之。望知楚。輔臣有言公



去。恐壞淮西屯田之成者。遂獨除之。望郭鈞乞守淮保江。詔公同諸將審度。時議有專保江者。公曰。非所以安淮人也。和州無爲貴雜。公撥巢縣龍舒常平。復請借椿積二萬。繼又捐金代無爲半月征稅。人始按堵。公力捐浮費。寬假諸郡。以所積酒渡課五萬請收穀爲二郡備。出納視常平法。得旨。專委本州倅。遇支遣先申省。和州舊糶馬料五萬。官給三萬。本錢州縣以數不敷。例科總首。倍費無藝。公奏屯田已成。歲收穀二十餘萬。乞就糶諸莊兵食之餘。本錢不足。則本司願助。人船悉從官給。遂爲公私無窮利。郊恩賜三品服。十三年二月。因任力辭不許。公視巢縣可宿師而無儲峙。乃奏糶穀二萬。仍椿三萬。緡以備修築。調發。秘屋二十楹貯之。承平時。六安置茶場。歲收息約十萬。乾道至淳熙。稍修復。佃占者十三家。茶戶且方爲所困。公奏罷之。許比附包占田土法。歲輸官立戶。聽與客旅有引者交易。朝廷持不下。孝宗特從之。茶戶立祠山中。韓德公庀職盡瘁。屢丐開會。鄭興裔帥合肥。拉公同薦和守張士儋。奏入。七日不報。鄭亟自解。因脩前怨。密奏出漕臣意。乃與士儋俱得祠歸。增葺圃以日涉。紹熙初。再任。明年以奉直大夫謝事。積單沛郊恩。轉至太中大夫。封江夏縣開國男。食邑三百戶。自告老。顏色視聽益精明。立不跛倚。坐不偃仰。治家教子無少倦。嘉

泰四年十一月一日。忽以微疾終于正寢。年八十有八。娶河陽李氏。中大夫元孺之孫。宣教郎。蘧之女。封碩人。先公十二年卒。子七人。長龜朋。屢薦不第。竟就世賞。今爲承議郎。通判信州。次格。先公三十五年亡。範。擢俱免。解勛。進士。耆年。先公一年亡。孫十九人。大正。大時。大椿。大全。登紹熙四年進士第。從事郎。四川制置屬官。大猷。大學。大昌。大聲。大韶。大受。大巖。夫任大用。大壽。大夏。大雅。大慶。大惠。大瑞。而大學先亡。曾孫二十一人。公震。公升。公顯。公回。公煥。公章。公舉。公晉。公岳。公郡。公鼎。公延。公謙。公靜。公添。公說。公運。公驩。公立。公岷。公饒。玄孫二人。元楹。元奐。女二人。適進士周端書。奉議郎。知郢州京山縣。許鼎臣。孫女十一人。進士任斗南。林杞。虞溥。從仕郎。漳州推官。葉舜咨。進士嚴維。太學生李自中。宗子進士趙汝洋。皆塔也。餘未行。曾孫女十一人。公氣質渾厚。剛果明恕。處已待物。一以誠實。喜揚人善。有恃才慢公者。不與校。居官嚴於馭吏。寬以愛人。晨出視事。不改常度。所至先修學校。禮師儒。薦名士。不待其求。開府沒於京師。公時年十一。扶旅櫬。侍太夫人出汴。而城已不守。過宿。併輿中。奉柩以行。楊帥呂公願。浩以事契留之。不可。徑渡江。是夜劇賊張遇擁衆至。全家無恙。識者已奇其先見。早志儒科。繼習詞學。無讀律淹典故。輕財重義。舊同僚居其里物。



故為棺歟。孫女鬻於人。取而嫁之。在州縣五十年。一意守公。去輒見思。晚以踈遠。受知孝廟。問荅踰於親密。雖施行僅見淮西。然亦未為不遇。嘗以千里江山榜便坐。有神州凝睇。老淚空盈掬之句。舉酒輒浩歌。氣老不衰。嘗從韓公元吉游。作文師昌黎屬詞皆典雅。有詩文十卷。奏議三卷。不喜釋老。而清心寡欲。自奉枯瘠。過之內外二百餘口。身率以勤儉。子孫曾玄至前。一一拊教。後事纖悉預辦。屬續如平時。前一歲。自馭生平。聞闕履歷。立身行已數千言。以授諸孫。其年十二月十四日。葬于邵武縣仁榮鄉新屯保萬松山之原。與碩人同域。銘曰。仕而遇主。遠不必踈。有韞如公。早戴令譽。州縣沉淪。玉階奮舒。烈祖知人。見輒動悟。不避所施。未為不遇。天錫公壽。復大其門。垂其安車。以詔子孫。校公所得。實多於位。勒銘斯宮。昭告全美。

## 黃正己

宋葉水心集黃君墓誌銘 君姓黃氏。諱正己。字聖與。溫州平陽人。始名千乘。字建侯。自言夢有錫以今名者。因併字更之。然相與君者。猶曰建侯云。曾祖賁。祖淳。父邈。紹興中為太學生。高宗慶八十。以恩補迪功郎。君自少時順悌。長老無違行。雖已肅艾。尤異抑

常稱善掩惡。退在人後。遇後有教諫。亦諷道宛轉。不令失色。詞常不幸有意外事。素不樂者。乘時擠君。君不憾。待之如平日。其黨後有急。君勇赴之力。為盡擠者慙服。人以此愛信。號長者。家故貧。迪功粗給衣食。君環視無幾何。嘆曰。富貴有命。吾自度不能益矣。然可復損於今乎。約嗇凡用。至鮭蔬細瑣。往往人不能堪。然客至輒具酒食。中禮。或一旦忽倒囊與人錢。不吝也。族人昆弟時節集處。君未嘗不先赴。抵掌極論。大笑為樂。有未至。聞笑曰。是建侯兄在耶。皆到。疑惟恐後。因相與竟日。不忍去。蓋雍穆之助也。君本有當世志。既無所遇。合而其子擢進士第三人。君謂曰。吾疇昔所願。不過乎此。進一官而止。然而終不可得。今汝乃得高第。又平進取願而不得者。汝無二滋幸矣。然立朝有義。臨民有政。自今汝謹聽。吾預告汝。因每事為節度授之。間浮舟散策。獨到山海。孤絕處。忘其反焉。嘉泰二年。郊祀禮成。封承事郎。故人親戚爭酌以壽君。君意亦自喜。曰。自吾祖垂三百年仕。蓋有祭其先者。吾何德。乃獨身被之。顧老不足為善。將無以報國而死。柰何。開禧元年。君疾且革。不亂。語不及身後。五月二十四日卒。年七十五。再娶皆林氏。封孺人。子男中承議郎。著作佐郎。兼資善堂小學教授。女嫁同邑進士薛仍。孫男三人。曰遵孫。還孫。近孫。明年三月壬午。中葬君于烏與



山迪功墓右崗。惟君幽潛私淑。報以其子。而中方佐太史氏掌教。元子嚮用矣。當大列鼎。養君也。而不少須以死。銘曰。種之炊之。有實其餼。熟而食之。孔美且馥。亦既難老。可以期耄。紀辭于泉。君子是悼。

## 黃仁靜

宋葉水心集黃公墓誌銘 越新昌黃公。諱仁靜。字仲山。其先發徙也。曾祖村。祖巽。父惠之。累封朝奉大夫。賜胙金。

紫。年八十七。開禧元年八月乙丑卒。十二月庚申葬益塘石家山北麓。娶沈氏。繼室潘氏。封皆宜人。子男六。度。朝散大夫直寶文閣主管建寧府武夷山冲佑觀。庶。庚。宜州文學。廡。從事郎湖州長興縣主簿。庭。迪。功。郎。池。州。州學教授。士隆。太學生。女二。壻奉議郎知婺州東陽縣韓墨卿。宣教郎知慶元府鄞縣周之瑞。而庶士隆及嫁墨卿者。先已卒。孫男十二。邁。迪。功。郎。鎮江府司戶參軍。章。鄉。貢。進士。遵。準。迪。功。郎。饒。州。司。戶。參。軍。單。第。中。餘。未。名。而邁。遵。皆早卒。孫女九。壻文林郎常州軍事推官周南。文林郎武昌軍節度推官求淳。從事郎婺州觀察推官王棊。將仕郎陳錫。餘未行。曾孫男七。女一。皆未亂也。黃氏越之聞家。而公越之君子也。少爲士。家未充米鹽。且夕急。公求所以逸其親者。百力督課。以身先之。未久。有田二十頃。以爲

如是不已。則以財自沒矣。於是諸子出師入友。交勸以學。而度中進士第。公喜曰。吾雖未耄老。然天其畀吾休乎。遂營隱居沃洲之尾。孟塘之山。以某夫人年高多疾。卧起須公。尚未決去也。及某夫人沒。終喪。松竹迷道。庭花合園。公着山人衣。曳杖挾書行吟。賓送日月於林篔簹中。凡故疇新畎。廩假進退。抱孫長息。婚嫁有無。皆落莫恍惚若夢中事。惟聞名勝士。欣然邀至。共食淡麪羹苦薇。焉語儒佛二氏所離合者。自言見性命真處。如水中鹽味。非無非有。其說深矣。陳君舉來遊經年。常縱論夜分。君舉名善辯。不能窮詰而畏之。曰。此非由師授而得也。至於天性曠達。不作疑吝。推己利人。不自封殖。無顏色之悅。而人譽其德。無市井之惠。而人懷其恩。蓋其中之信於人也。方度宦浙西。公未不過三月。爲御史諫官。事有當言。言有難盡。微婉順導。莫必感發。前後援親以請。至八九。輒不聽。最後命使守泉。復固辭。天子知公實老矣。乃自憲謨進直寶文閣。許以養公。君臣父子之際。人又以爲難焉。蓋自癸未至乙丑。四十餘年。公子孫屢以文字起。庚庭既釋褐。公疾始侵。呼章語之曰。汝知吾樂乎。章對不知也。曰。夫除世俗麤事。易斷細微精想難。吾用力於此久矣。然枝葉生不知其幾。今真斷矣。故樂也。臨絕視度而笑。度指其心曰。得非能於洞然乎。公應曰。然。遂歿。銘曰。



昔君之來兮。友茲山而誰儔。今君之去兮。邈茲山  
乎何求。其風䟽䟽。其月皎皎。彼蔚者載。不尚有詔。

### 黃景聲

宋何澹小山雜著黃公墓誌銘 紹熙元年冬。某自諫大

夫除御史中丞。法當辟屬。念不可市私恩。應故事。博采中  
外平正有守之士。僉曰。無易今奉常博士黃公邁。乃以名聞。得旨。除御史  
臺檢法官。朝賀得人。而其實無雅素。公亦不自如也。既入臺。論議。介而通。  
不隨聲應和。亦不務沽激。事歸於是。或不可。萬牛力挽莫奪。然後知公之  
果賢而不求時好者矣。公字景聲。始祖惟淡。自光州固始徙昭武。五子各  
授一經。人名曰黃五經。後派別而居和平者。公系出焉。曾祖文絢。奉議郎  
贈開府儀同三司。祖德裕。登元豐二年進士第。左中大夫。贈少保。考邦式  
朝散郎。贈正議大夫。公幼穎悟。不借群兒戲。危坐書案終日。母定國夫人  
鄧氏。嘗撫而言汝必昌吾家。紹興間。以廩入官。嘗魁銓闈。連預漕薦。隆興  
改元。始奏名南宮。初主南劔將樂簿。整邑之賦籍。不容欺隱。有訟在官咸  
請付公平決。徙衡州司法。倉憲二司所聚獄繫夥。公一徇法理。不伺上官  
意。分教長沙。以作成自任。取人先行誼。輔以課試。為陞進次第。請謁不行。  
其所獎與。果知名。歲旱。帥漕講荒政。屈公預議。全活甚衆。交薦改秩。得邑

新建南陵。俱以憂不行。杜門讀書十年不調。甘貧茹苦。繼宰太平之當塗  
邑。以二百緡為迎新費。公拒不納。妾隸徒行。朱漕安國即以廩闕。瀕湖圩  
田二百餘里。遭水衝決。議者憚其役。公性喜為民興利。至則悉力經紀。日  
役畚鍤五千人。兩月訖事。植楊八萬護其址。復許氏占提植桑柘。又請勿  
起稅。迄今蒙利。月供郡額二百緡。名軍衣錢。前後白科取。樞密陳公騷時  
為守。從公請蠲之。既又志顛末于石。以為定例。編戶有緩輸者。摘二三書  
而投之布囊。封示縣門。約期而啓。至者免逮。人毋敢後。閱三歲。竟無點追  
者。諸臺以古循吏薦。秩滿。除幹辦諸司審計司。江陰守。請濬橫河為民利。  
合孝宗意。即支所費。擇公往視。政地主其議者。亦以賞啗公。公唯唯而去。  
入境。謹言不便。即條列以聞。或言且逆上旨。公曰。上本欲利民而已。不為  
變。尋除太常簿。陞博士。遂為臺屬。輪對首論無逸享國之永。辨君子小人  
以救士風之鮮廉。復陳蜀事。借疾為諭。曰。如疾之兆於未形。起處無異而  
偏勝太過。潛伏腑胃。宜預為防。上深肯許。未幾朝廷遣張詔守興。其後逆  
曦歸。果生變。人以公為知言。明年遷秘書丞。提舉浙西常平。五年。除提點  
刑獄。畿部訟繁。且多掣肘。悉裁以法。后族有摘佃官田者。公曰。餘將誰受。  
分為四區。聽所請。秀邸隸不容民贖業。公立限責還。豪右聞風披靡。吳門



有庫吏竊用經總制錢。獄司誘令攤執。因爲姦利。公一日詣獄視囚。所供溢元數萬餘。即榜通衢。資貸而有要約者償。餘悉弛。百姓感泣。公尤欲革薦舉之弊。一采公論。無敢挾勢以請。所得多佳士。改湖南漕部。民率詣闕借留。時謂創見。未上。移守贛。力請奉祠。皇上初元。丞相余公入謝。首以公薦。得旨奏事。除侍右郎中。既對。極言黨論之偏。曰。昔之立黨。所有所因。如熙寧元祐之論新法。紹興之論戰和。遂成同異。今之立黨。本無所因。而自相封殖。以爲勝負。願察邪正。以公用捨。士論聽之。遷尚左。兩選多弊事。公因轉對。擇十條以獻。如京秩及格一考。方許離任。特恩限年入官。以遇赦之年起理京官出身。必作邑。恩例占射。不容遠指。窠闕之類。皆施行。未幾除右司。權臣寢用事。公謂都司紀綱之地。設有干請。難屈法。一日。仰曾來謁。闕亡謝之。自知難久。乃丐外。明年春。除直煥章閣。知建寧府。制詞謂質直而有氣節。郡父早穀踊。多剽掠。公即發義廩。勸上戶禱雨。隨應。人心稍寬。乃以休沐閱士卒。更製旗幟。修軍政。以銷姦慝。所至必崇學校。秀學有蘆塲五百畝。爲權貴所奪。即取以歸。又從平江校官所請。得廢寺沒官等田三百餘石。名義廩。歲取祀范文正公及教養其遺孫。士有入上庠。預薦登科。貧不能葬親。與嬰孩之遺棄者。皆有助。今文昌戴公爲之記。建學

尤弊。公葺而鼎新之。在建歲餘。百廢具舉。三年。除江西提刑。公曰。知止不殆。吾不能俯仰權門。其可久仕。復丐祠。周丞相益公貽書謂。公高行配古人。清風激頽俗。嘉泰改元。得請謝事。以居熙春山下。自號熙春野老。取孟子四端之義。榜其室曰人齋。杖藜野服。惟意所適。登高索徑。忘其疲倦。歸休十年。康寧如一日。開禧二年秋。忽膺呂東萊世間萬事何時足。數閱曰。吾將歸矣。十一月十二日。感微疾。索筆書兩偈而逝。享年八十。先娶胡氏。再上官氏。贈宜人二子。靜夫。舉進士第。奉義郎。知福州閩縣。崇夫。迪功郎。新南劍州司法。仲子。集夫。命以官。後伯氏提幹。邁。今爲迪功郎。新衡州司法。季弟。主簿。造。鄧夫人所鍾愛。早世。公篤念之。即以致仕。思奏其子。約夫。孫男二人。章孫。弦孫。孫女四人。公入仕踰五十年。處已待人。表裏洞達。無一毫欺僞。居官不容悅。而能自全。終始有異已者。卒莫加害。則以識見高明之故。性簡淡。刻苦學問。游戲釋老陰陽方技。諸書。作詩格律甚高。駢儷精到。晚歲手不釋卷。自集所著爲五十卷。居鄉不以輩行自高。談論疊疊可聽。自奉養甚薄。不飲酒。杯羹豆肉。衣不敝。不易。尤以孝友著聞。正議公有意卹宗而未就。公承先志。撥田置莊。計口給食。自五世祖以下。均及。由是宗族輯睦。嘗登東城寧國寺莊山樂馬。捐金易爲壽藏。是爲邵武縣黃



溪東保鶴冲之原。葬于戊辰十月之乙酉。後三年。靜夫乞銘于某。託契不得辭。銘曰。義耶利耶。惟擇之安。弗比于時。寧戢其翰。以公抱負。盍舉千里。顧義不可。未翔先止。訛訛翕翕。榮不蓋慙。我老熙春。寵辱莫干。樂哉斯丘。手所穉卜。千古高風。誰其繼躅。

## 黃策

宋曹考約昌谷集黃承議墓誌銘 閣學黃尚書既薨。僅一歲而通判君亦即世。君於尚書爲長嗣。賢而以孝聞。造物者奪之

驟莫名其說。其適然耶。其哀毀過節而益其疾耶。哀毀固有之矣。事亦有適然有相值者。然而家失。令子官路失。賢士大夫。眇然人物之時。老成既已凋喪。嶄然俊偉者。又復淪沒。可爲短氣也已。君諱策。字子長。曾大父諱彥輔。故從事郎知吉州吉水縣。娶李氏。大父諱去華。累贈太中大夫。娶周氏。贈淑人。是生尚書公。尚書公諱疇。若入朝爲禮部尚書。去國爲煥章閣學士。爵至豫章郡侯。贈宣奉大夫。出入藩從。家有傳。國有史。通判君幼而岐嶷。少長業舉子。既壯。以父任得官。自承務郎轉至承議郎。自成都安撫司書寫機宜文字。改簽書劔南東川節度判官。知吉州泰和縣。通判潭州。以憂去官。而屬續及之矣。太和多士之地。又多巨室。今稍不自愛。雖自愛而弱不能立。或少不更事。則吏民持其柄。不敢孰何。君剖決肯綮。既有以

服其心。正辭理財。自酒課一事。檢柅弊蠹。沛然滂足。無所欠闕。然後寬租賦。弛市征。紓民力。而通商賈。惟意所欲。以至葺治庠序。選補雋秀。職業所該。靡一不舉。長沙會府。征調浩穰。關決之事。視他郡爲重。適時板築。以才選獨任其勞。旬月訖事。公私若無聞。知增募飛虎卒。亦得專任其事。取其勇力善鬪。不問所從來。提舉酒務。增釀城外白酒兩庫。取以給軍。皆獲其利。此其發於事業如此。至其脫穎絕塵。則又有不可及者。方虜騎闖邊。朝論慮調度不繼。稍行鬻爵法。給官資以下州縣。責以期程。且水旱間作。又給僧牒以助濟貸。亦急於售。名項雜出。不得已而及於民。強者乘勢方命。弱者無以自解。胥吏旁緣爲姦。所至搏手。名爲禮請。其實抑配。強之以孟酌。雜之以械繫。雖以無道行之。終不得其要領。君時在泰和。獨能深思熟慮。謀於泮宮。託之士子。度其事力可者。更相勸誘。文移無所施。鴈鴛無所與。鬻爵鬻僧。所求皆集。一時守令。未有出是奇者。予幸得備數帥守。親聞其事。即以君姓名上聞。諸臺亦先後剡上。屬方急賢。謂且清切矣。求便親待次。乃得潭倅。以其所處。觀其所就。疑得壽而顯者。聞計而歸。即忽忽不自持。以至大故。平生恬於進取。不以超躡動其心。當調劔南。取官時。總餉者。招以幕府。辭避不受。在長沙。遇寶赦。例當進秩。遲留弗請。聞親病。遂不



果上。致其階不至郎宿。非不遇也。生於乾道之癸巳。卒嘉定之癸未。享年五十有一。娶熊氏。同邑進士所之女。江西安撫司幹辦公事方之曾孫。子男四人。端卿。良卿。敏卿。厚卿。皆力學能文。端卿當受尚書。公謝事。恩命孫一男五女。家世隆興府之外邑。初居分寧。與雙井同譜。七世祖遷豐城。沈江。自高祖而下四世。賜第者凡八人。遂爲豐城第一族望。諸孤將以甲申閏八月丙申葬于新建縣南陽小象牙山之原。而端卿書來乞銘。予既受尚書。公深知。又與通判君接官僚。高其名而騰其實矣。義不可辭。乃爲之銘曰。其行也恂恂。懷經綸也。其政也肫肫。銷頑嚚也。進而循循。尊其身也。處而泯泯。存其真也。有祿而輟。恐羸其民。無疾而呻。歸不見其親。其蘊莫伸。當泰而屯。死從其先人。求仁得仁。

## 黃仲脩

宋黃勉齋集墓誌銘 余爲令臨川。愛其山川風俗之嫩。名儒鉅公。彬彬輩出。故家遺俗。皆知尚氣節。畏清議。信厚

而質直。其天性然也。黃君思永。字仲脩。其先金華人。徙豐城。後遷是邑。余嘗過之。入其門。庭宇間寂。登其堂。主人肅然。問起居外。不輕發一語。氣貌凝重。進止有常。見其二子。延客坐。屏飭樸素。器用純質。坐容常滿。然無雜賓焉。自是累累過之。終三年猶一日也。予與仲脩交最久。仲脩足迹未嘗

造公庭間。嘗走鄉疇。視時穀價之貴賤。仲脩獨下其價以售。調卹閭里。後於仲脩之家者。歲凶無流徙焉。篤於教子。不爲剽竊以微利達。擇師取友。不遠數百里。必求有學行者致之。爲子擇婦。不以財。必以世之鉅儒與鄉之名騰。嗚呼。何其賢且厚耶。訪其家世。則左朝散大夫吏部郎中提點荆湖南路刑獄公事贈通奉大夫次山碩人章氏之曾孫。通直郎知靜江府義寧縣事愷之孺人徐氏之孫。貢士逢吉夫人管氏之子。叔祖瓊管公擇仲脩於群從之子最賢者。以爲貢士後。蓋邑人之右族。其生產之厚。裕如也。士大夫席父兄之業。擁高貲。鮮有不習尚浮靡。貪榮嗜利。恃氣陵物。以累其身辱其先者。今仲脩家世如此。迺能自處泊然。無一毫驕吝之意。豈其天資之厚。有以守其故家遺俗之舊耶。仲脩年四十。卒於嘉定元年十月朔日。娶饒氏。子二人。慶臣。清臣。女二人。長適進士饒洽。次以疾廢。慶臣娶晦庵朱文公之孫監酒朱君堃之女。清臣娶寺簿王君克勤之女。兩君家甚貧。後仲脩數月亦皆卒。王君且死。其家遣姆來曰。妾不幸有夫之喪。女長無以嫁。夫人其改擇焉。饒夫人曰。吾言已決矣。擇婦擇其身。非財也。且寄語於朱氏。謹毋以貧爲嫌。二子無異意焉。嗚呼。非獨仲脩然也。如其妻子亦賢且厚也。道行於家人。固若是耶。仲脩將以嘉定三年十二月十



八日壬申葬于縣之明賢鄉唐門之原。二子以其師盱江傳沂之狀來請銘。余既獲交於仲脩。又於其長子有妻黨之親。知仲脩之行事爲最實。故不辭而爲之銘曰。植根厚者其華必豐。浮埃爲基。胡墉之崇。猗歟仲脩。古人之風。器大聲宏。不于其躬。銘以俟之。列于幽宮。

## 黃凱

宋黃勉齋集墓誌銘 黃氏居福州城東三百年。釐而爲三。派而爲六。後有他徙者。自同慶而下。子孫存者無慮四十人。挾策

爲儒者累累不絕。紹興間。察院公始以薦行直道。清名高節。著聞當世。子宣教君杲。通直君東。亦皆孝友廉潔。挺挺有父風。又六七十後。路之黃諱叔慈者。生先覺。先覺生俊卿。俊卿生公諱凱。字舜舉。獨能以勤儉大其家。苦學守禮法。教其子南金。宗尹。宗傳。皆雅飭爲良子弟。南金以弱冠預鄉貢。宗尹亦繼入太學。一門之盛。庶幾哉。察院公之遺事矣。嘉定庚辰十月丁丑。公微疾。終于正寢。初娶何氏。後兩娶陳氏。子三人。女一人。婚嫁皆未畢。而公之年僅五十有二。乃不及享其盛大之福。識與不識。無不爲公流涕也。命之脩短。懸于天矣。勤儉苦學。守禮法者。人也。一族之間。三百年之久。其盛不過再世。皆以勤儉苦學守禮法得之。則公之行信可書。公之子弟與凡吾之族人。皆知以公爲法。則吾宗之大。未有艾也。其年十二月

壬午。葬公于桑溪艮山之原。其族孫幹爲之誌其墓而系之以銘。家之興替。不于其家。于其身。天之報施。不于其天。于其人。謂予不信。視此堅珉。

## 黃澤民

宋陳耆卿寶窻集黃君墓誌銘 項麗水有賢令曰黃君沐之。未滿歲死。死滿歲。其子傳奉監州詹公。又民之命自

長溪。來連銘。君賢。宜銘也。能使上官思其賢。經紀之。振耀之。愈宜銘也。君字澤民。唐昭宗時。有校書郎名璞者。著書號霧居子。生說。自說至允章三世。咸有祿位。五世至大中。封迪功郎。大中子十萬。封承奉郎。十萬子楫。中第。不覓舉。以通直郎老于家。君其仲子也。君讀書務通大意。耻爲章句師。既冠。薦第三。明年奏名。調義烏尉。邑多土豪。與鼠輩相出沒。見君尚少年。薄易之。君與其屬約曰。必勸是。吾始貫汝。賊有鐵彈子者。負險格敵。君躬擣其穴。縛以歸。自是義烏不苦盜。州歲歉。檄君覈視。君語其輔行者曰。吾敢忤太守邪。然不忤太守。則忤民矣。民不可忤也。幕府疑其釣名。君爭之。卒減賦十六七。常平使者又檄君賑濟。已而出不意。行部見在積粟。不類歟。深駭異之。故事。尉巡行。必使里正饋食。每觴容。胥卒供凡費。旋以追逮文移。暗酬其直。君謂此假手受賄。寧餓死不敢。太守聞焉。增俸。去之日。不持一錢。關陞。令上杭縣。嚴吏而寬民。緩財而不留獄。雖休澣。若暮夜亦許。



投牒即理。未可責育莫奪也。大家鄭其姓者。持邑事短長。連蠶數令。君疏之郡。論如律。縣至鬻鹽運丁稍失期。則上供負殿。君通融有術。課倍登。改秩知麗水大較。如上杭。胥吏弄財賦。不問輸未輸。混為一籍。賄至籍立。改以上戶產移下戶。下戶究不堪命。君蒐獵見底裏。重寘吏于法。賦始平。方將脉縷源流。爬梳隱瘼。立程式以惠來者。意懇懇特甚。予嘗行其野。民誦君一古洎謁入見。君竟日据案問有暇乎。曰無能彊飯乎。曰不能也。嗚呼。予因疑君甚矣。視其貌則魁而腴。意不數月死矣。家人問所欲言。曰善教吾子。乃瞑。年四十四。娶徽州判官楊及申女。子長傳。次觀。予每慨才與志人所難也。而無之者尤難。無之而發蚤者倍難也。如君兼之而發且蚤矣。夫激石裂。雲飛川達。可以至而不至。命邪。發之蚤者固不若晚而成邪。然則彼有無才與志而涕洟以壽。偃蹇以貴。名謂之成。而實則非也。君兄名清之。少相磨以學。學本諸老生。孜孜勸君。父且大。君仕竟矣。兄未官。扶通直。哭失聲。無幾何。通直亦死。家事惟清之。凡予所掇拾以銘君者。清之筆也。詹公拊傳首曰。汝無父。有伯父。爾其事伯父如父。嗚呼。世有上官之賢。憫其寮之死。而眷眷其家。若此哉。君死以嘉定十二年三月某日。葬以其次年某月某日。墓在某鄉。銘曰。鸞停鶴矯。森羽翰。跬視層雲。莽無邊。逆風吹汝。擊弗騫。豈獨汝泣。人共憐。自古有死。誰百年。壽跖不博。矢回賢。嗟哉澤民。卧幽阡。光氣不沒。珠藏淵。

## 黃觀復

宋葉水心集墓誌銘 承事郎提領所幹辦公事黃章字觀復。余友禮部尚書名度仲子。檢身一以正。不中於規矩。

繩墨不行也。與人一以恕。不著於親和愛。敬不止也。講學必於師友。不足以達於道德性命。不求也。應事必於法義。雖足以通於變故。倉猝不用也。父母信之。兄弟順之。鄉黨朋友皆悅而訓之。樂其寬而畏其嚴。慕其廣而遵其儉。久而鄉大夫國人。又皆允之。將進矣。嘉定十三年正月初八日卒。官下年五十五。十四年十二月壬申。葬小江尚書墓側百餘步。夫人謝氏先卒。再曰趙氏。子元護承務郎。元真通仕郎。二女子未行。弟準來請銘。按昔無銘人三世者。疑未聽。準曰不然。銘吾父祖以及吾兄。一於善而已。非三也。讀是銘者。悲吾兄以及吾父祖。一於善而已。非三也。嗚呼。余果不祥耶。黃氏果不幸耶。銘曰。人乎觀復。永百秋。斗揭嶽。佇江河。派。天乎觀復。豈其仇。聲滅影絕。何所游。但哉銘乎。炯厥幽。

## 黃子通

宋曹彥約昌谷集墓誌銘 黃子通處選調三十年。無進意。晚得入鑲。莫口不道。求薦事使者。與好事者。皆切歎服。



又極力推導之。頗有端緒。未聞其疾苦也。寶慶改元之明年。歲在丙戌。時  
乎楚節。享家廟奉親。歡無廢事。明日得疾。即以屬纊。告享年纔六十有一。  
聞其名見其面目者。顧無識則已耳。稍有識。則莫不短氣大息。甚至拔淚  
不已。蓋其爲人。天稟渾厚。父母曰吾賢子。妻曰賢夫。弟妹曰賢兄。達於宗  
族親戚朋友鄉黨。賑貧乏。助婚嫁。力所可及。靡不殫盡。則又皆賢其行。雖  
本郡太守薦士於朝。則亦首稱其素。以爲不可及也。平居闢便坐之室。列  
前輩遺訓於左右。聞善言善行。必手自抄記。反覆展玩。躬而行之。惟恐不  
合。居官善待士。不擾其民。讞獄務平允。議政主寬厚。攝它職不食其俸。謹  
出納不取其贏。外不事表襮。而人推其才。進不由科舉。而人稱其學。其言也  
似訥。其行也似緩。而其主盟正論。檢扼吏姦。有萬牛不可挽者。初以寧宗  
登極。恩授將仕郎。入銓等。爲安慶府太湖尉。兩調處池二州。皆爲法掾。池  
守雅服其才。及改擢王人。亟以賓客舉。辟倚。歟。畫爲重。行公道於帑廩間。  
異時恃苞苴。假氣勢者。無所措其手。所更歷纔若此。而其所抱負者。不可  
量也。昔西坡先生從晦庵。朱文公游。立朝耿耿。不負所學。持使者節。以蠲  
租救荒。得罪時論。居間累年。不自辯其是否。賢士大夫見之。而心醉。子通  
克肖其德。人之敬之者。猶其敬西坡也。與弟建昌軍錄事參軍。枯薄宦奉

親。更主家務。叔出季處。人無間言。至是。枯來奔喪。奉以歸葬。將以是年十  
一月庚申訖。大事于星子縣清泉鄉大礦方家嶺之原。以友人胡泳狀。未  
謁銘。不可辭也。按南康軍都昌縣黃氏。派出於江州湖口縣之沙港。地迫  
都昌。故都昌多大族。西坡諱灝。故任朝散大夫。廣西路轉運判官。娶高氏。  
武顯大夫汝翼女。年踰八袞。今封宜人。西坡之考諱唐髮。故任左文林郎。  
溫州平陽縣丞。贈太中大夫。娶伍氏。贈碩人。平陽府君之考諱澤。隱德不  
仕。娶魏氏伍氏。自平陽而下。徙居大寧。其上則族處松蘿。皆都昌也。西坡  
晚居城下。今三十年。子通諱抗。乃朱文公所命。兩娶陳氏。皆池州通判。非  
之女。亦皆前卒。一男子克將仕郎。女適光州陳史君。子禧。請銘之曰。  
擁腫漫山。世豈無材。木心不正。將焉用哉。折楊載路。世豈無聲。一入俚  
耳。啾啾眩名。誰歟及物。焚券棄責。外雖強名。中有德色。議論磊落。神沒鬼  
出。筭計見効。百不及一。賢哉子通。粹然德容。聲竑形厚。大呂黃鍾。孰不養  
親。子通養志。孰不持身。子通守義。秉衷洞達。內方外寬。以此治家。以此居  
官。官則不顯。我亦無求。死生夜旦。何短何脩。持此歸報。西坡先生。無世間  
累。有身  
後名。



# 黃簡

宋劉後村集墓誌銘 朝請大夫黃公諱簡字德廉將葬孤浚明奉家傳來乞銘余矍然曰公吾故人也銘其可辭黃氏自固

始遷閩至八世祖校理公興自泉遷莆曾祖璋祖文炳贈朝散大夫父艾刑部侍郎贈少師為紹熙名臣公年十六以胄子試春官不利父任為承務郎歷鎮江府江口鎮稅休寧丞知會稽豐城縣通判嚴州知賓柳二州端平乙未閏七月丙寅病卒于寢年五十九明年九月壬申與宜人方氏易氏合葬于城南小塘山方中散大夫勛之女易禮部尚書祓之女一子浚明將仕郎一女適衢州文學陳楷公凝重靜默語笑容止皆中準程出於自然律身居官尤嚴恪初少師公在諫垣論擊辛卿棄疾幸銜切骨及尹鎮江公已先去猶鍛鍊吏卒終不得毫毛罪休寧有十四年不決之訟公一閱得情會稽繩貴游雪獄寃豐城築廢堤修學政徭攻賓州公調土豪義丁夾擊雞獮無遺絕口不自言勞州始貧比去帑度皆實柳之兵吏始按月支俸南官有不幸者必經紀其家然公所至剛峭自立巍巍有風稜不肯隨世俛仰其在潤越皆以避仇去在嚴以忤巨室去在柳以諫官誅賄不得去同時污吏憊夫多據要劇起顯美公方閉關蕭然食仙都崇道之祿以老歲月及天子親政向為權姦摧抑廢退之人稍見收用而公

忽忽死矣公事母齊國方夫人盡敬拊諸弟極愛歲晚鴈行凋零始衰多病俄而季弟番禹通守篋復天公哭之慟奏官其子欽明易箒猶曰吾死無可恨如諸院孤幼何聞者悲傷其意為銘曰 寶紹之相教利怙權以賄少多為人否賢富絜諸霄貧擠諸淵嗟嗟黃公白首瘴烟端平反是廉約者甄公不少需遽既而僂前厄乎人後制乎天嗟嗟黃公返于斯阡

# 黃丙炎

宋劉須溪集墓誌銘 歲庚辰予初與純父遇風雪東湖之上驚相弔曰賈鹿泉見君文問古人耶今人耶或者亦

以君為古矣君在此耶語雜悲喜至甚夜不絕未明復撼予語拊髀浩然曰吾平生慕湯東澗近年慕君亦欲從君後耳君豈從古心公致誤耶識君慷慨叙寄不淺因擁衾而起以所聞於江先生者為君言之如東澗何可及也未第時與其兄容徐景說標致已不相合既第待信州戶闕一日有趙尚書出參贊督府視事首見簿姓名歎曰余識之真西山時湯某乃猶為此官哉即拜疏薦之代主象山從是隱然出徐徑吸上自端平至景定三年出入諸老皆成履歷即小人扳引及當國所忌惡皆不足為全名之累不待辯某事忤某人而大節自不可及此如陳太丘黃叔度公論常



身爲之地。故樹立矯矯。不肯爲人稱門生也。亦各其時命也。言未既。君淚沾余衾。獨舉往年麻姑山夢。夢一籍題忠孝二字。而某在焉。孝不敢言也。忠特若此。予亦喟然于少年州縣不自試一二。因舉子房天授沛公。它多疑拒。獨縣悟如子房意。此所謂漢事將成也。誦出師表。至引喻失義。以垂忠諫。想見庸人自用。故傷心元德之不見。身世何長。今人喜言四方上下。孰知言不見奇。奇而不用。不用而驗。驗而悔。悔而恨。恨且見禍。其進退偏仄。復非前古君臣之比哉。君曰。世事勿復言。即文字何等。不足存。而魏鄭公以此揚大年。以此憾至死。因泛論鄴侯山人高致。魏延與淮陰。膽畧相似。李伯紀張魏公成敗天意。語不必有出。出不必有謂。未嘗及心事。彼此直歔歔。徃復。不知出於君之口與余口也。於是相知深矣。復欲與君談。不可得矣。前年猶寄余詩。去年有持書來。視緘題若不可識。則君死矣。余以歲初謝客。嗚咽而入。問耿蘭以故。至舉扶中相屬語。腸痛欲絕。海內人物風流略盡。託君筆墨相蔭映。後死猶有講學之望。顧不樂人間世如此。念前冬有沅湘老人以君文求余。記曰。黃先生雖不能飲。尚健坐。余謂純父長七尺。年五十。生世大有事在。迄如此而止。造物復何以我輩爲哉。讀門人狀君行。豈不整容嫉至。然不如君前夕劇談盡。予著君語語而俯仰浩

蕩。人物著微。心跡纏綿。功名蹉跌。後有君子。可以想見而歎。若狀所難言。又有人不及知者。江間貴人與邊守將不相接。君代書密付。語見赤心。指授得宜。又多軍情所鬱不得達者。繇是感泣思效。倉猝用意。勝謝東山。自異顧內幕。所左右能此而已。其苦言節費。見於賞募。得淮卒三千。備遊擊。爲淮捷營。改鐵鷁小舩爲膠腫大艦。取勝。議諸郡閉絕流民。如它盜。請城外築堡居老弱。而各選其壯者從軍。便爲閩帥釋當路之怨。馳從約之書。共圖國憂。曾懷磊磊。出於人所不望。而人亦知惟君所爲。嗟乎。使君得乘一障。亦當遠勝一間。雖九江事去。相府通虛。諸司蒙茸。君猶力勉以私財。招軍撫溪峒。爲用。至獨松失守。庚牌暮下。速援行者。議饒信道梗。盡徑崇安。繞出三衢。兵夜發。君與家人不相顧。至石門。遇長幼相泣。君曰。國事至此。暇顧爾輩耶。自是言之。有傷心者矣。國家養兵三百年。體群臣子庶民。三宮仁儉。一朝有難。人懷顧望。徒擁烏合。盜府庫。君以書生志氣。感動言必稱君父。然至行而肝閉。人闕而閔潰。肝城閉。有投擊城下。至斃者。諸將欲屠之。君正色不可。曰。我輩以路梗假道。致疑耳。若屠一城。三宮聞必震駭。諸將已瞋目謀不利。君不爲動。既又具軍行宿次啓奏。有笑者曰。君猶謂有通進所耶。君慨然泣下曰。誠不忍以爲無也。聞者始掩涕歎息。及入閩。



有狼將以衣糧乏。咄咄謀劫主帥以出。語已逼君。又不動。一日坐水閣。有飛矢掠項。過著柱。跡所由來。忌君者出此。明日君行。軍亦潰。生亂世無及於救。又不自為政。故所就止爾。然積誠所至。在建而勸分。分建昌而祈雨。兩皆以客館係人望。得天意。亦何嘗有一日得行其志。而惜之者如已試。世自有盡。君名方興。有西園八十之老傳。太史自得以君來。為賦詩喜曰。碑無龐老名。又曰。能威兵處在真誠。其志慮風來何如也。自咸淳第授靜江府臨桂簿。嘗辟泗州淮平尉。不就。後五年。辟建康府鳳臺酒庫。自是始與幕議。又五年。辟臨安府德清酒庫。德祐初。差幹辦江西制司。復帶行禮兵架閣。未幾。復帶行國子正。明年除宗正簿。督機。特改宣教郎。初筮交代。違年不願上。仍待闕。淮平界北。得遙授。曰不取欺。及登畿。有銜命鈞致者。自免徑歸。諸司舉削。常片紙書所聞。廉介有政聲者。請以已所應得者舉之。受舉者不知也。或知而謝。輒避去。此事亦近年所罕見。余出仕十五年。未嘗受人一削。君自謂出處與余同。謂此自其父得聞象山之學於其諸大父。益貫徹。朱陸授學者。懇惻窮至。所至老成欽動。諸所識。予不能盡知。而尤於丹徒陸君實。秀夫耿耿焉。君實大節可哀。君實文不多見。見君文。識君實。宜君實之所納贄也。君文不蹈襲諸作。不為時文議論。講義註疏。

而辭事義理俱至。清整涵暢。足自為家。詩益有思。正是竭目前意。樸厚雅馴。視他人能此復少。彼至於家庭。講授人物大意。倫紀親切。廩廩見之。千峰陳公宗禮嘗對人云。吾欲得一客如黃純宗。清苦不可得。其文之有本。又如此。士常患不第。一第足自致。誼能以去就易民命。爭國事。彼權偉險。茲貪懦狠僭。辭能闕。意能誠也。世狹道迂。而環轍如陪臣。生臆如車中。及其窮。感無能有。甚於魯男子之不得去。而南霽雲之不能食也。嗚呼。微斯人。斯世之不幸。斯言也。亦孰知其可悲。君臨川黃氏。居崇仁東里。諱丙炎。初字文炳。晚更字漢翁。予誄之曰。純父。其鄉稱之曰思梅先生。生丙申。卒丙戌。曾祖儼。祖邦基。父應辰。梅牕公也。思梅。思公也。妣陳夫人。娶陳氏。子男六。慶孫。興孫。鳳孫。翼孫。暉孫。慈老。翼孫。繼姍。黨陳。慈老以治命後。鳳孫。慶孫。筆墨可愛。皆如思梅復生。壻趙次愚。孫男五。女二。葬崇仁鄉西隱里。雷公山。寶丁亥三月丙午。君厚重不妄語。踈闊無餘懷。及所委曲。傾盡若自營。收致後進。有豪氣。乙丑。自京歸安仁道中。有盜殺人逸。累居者既誣服。君以過客得盜名。告使者。使者得實。謝曰。君乍脫場屋。洗冤如此。可量哉。其後避難。得便舟出溪峒。各護送。皆所嘗盡力有恩意者。亦若有助焉。銘曰。嗚呼。國之初也。材不必其如君。世之甚也。憂不必其如臣。莫不



幸於以身從人。又不幸而以文致身。故雖有孔明公瑾。而用之如陳琳阮瑀。又如溫名二子。而不得為許遠與張巡。豈非命云。

永樂大典卷之七千六百五十

永樂大典卷之七千六百五十一

十八陽

黃

黃自信

宋林希逸竹溪集墓誌銘 永陽龍嶼黃革叟遜齋糾曹公之次子也。諱自信。與其兄某同事樂軒陳先生。以見稱

早歲有場屋聲。亦嘗走江湖矣。交游甚眾。諸老頗許之。中年喜學詩。盡焚他藁。築室以適。軒名曰夕吟詠。其間暇則焚香鼓琴。有蕭然自得之趣。雖先世簪紱華盛。自視漠如也。生平守師學。鄙夷流俗。緇黃占卜之事。至死不變。潛心經典。大抵以詩發之。故有適軒吟藁。紀行游湘游岳諸集。余嘗及見其半焉之跋矣。今存者一千六十八首。無非翰寫已意。略不蹈踐古人。前死知其學力也。咸淳己巳三月六日。終於寢。春秋七十有二。其年五月十六日。葬薊蠻山。弟某求乞銘。曰。君垂歿所囑也。余少因樂軒翁識君。父子於溪上。糾曹南游初程也。于時君兄弟如玉雪人。皆以遠業期之。今止爾。傷哉。余初記薊蠻庵。又銘卦齋墓。今又銘君。俯仰五十年如一瞬。自感今懷昔。能不愧然。遂廢一食。為之銘。君娶陳氏。先君卒三十年。子一人。



公裕其世次見朴齋銘。茲不重出。銘曰。得於師者正。得於天者高。不耽於進。其適者哦。不羨何久。不求何遭。呀於人者多。我以銘之何。

### 黃鍾

宋陳元晉漁野類藁墓誌銘 余乙亥丙子間。開門受徒。黃朝

從容叩其疇昔從誰學。則起而曰。家君少篤學。胡公元衡為郡文學時。以巨題試諸生。家君以詩出奇。押窄韻得句為首選。經史子集皆手自點。甚病時文之典。則取省監程文數十篇。鈔黃批抹。皆有關鍵。日夜為朝瑞講說。然嘗恨夙無師承。凡所造悟。皆心自尋繹得之。憮然不自以為足。故遣朝瑞從先生游。余乃知南溪為人大槩如此。後二十有七年。其孫鱗卿補充太學弟子員。又見其鄉人為余言鱗卿年五六歲入小學。周夫人憐其幼。公曰。子弟凡事皆可遲。惟讀書一事不厭早。扶隄左右。觸事輒誨之。所以教鱗卿者。猶所以教朝瑞也。既入上庠。人以為南溪種學種德之報。南溪方進鱗卿而誨之曰。太學多士所聚。重厚浮薄。色色有之。汝往取友。必端。毋詭隨。進學必力。毋自畫。余益知南溪有識趣如此。壬寅十月六日。則聞公死。吳得年七十有二。越二年甲辰十二月十六日壬午。朝瑞奉公柩葬于所居南二里大池原先塋之右。鱗卿狀公之行實來曰。鱗卿父子事

先生有年矣。知先祖莫先生若。乞賜之銘。余不能辭。公諱鍾。字彥遠。鄉人稱之為南溪先生。曾祖某。祖某。父某。以孝弟力田世其家。公幼穎悟不群。嗜學如飴。至天文地理。瞿曇老子。稗官小說之書。無不通解。對客口誦。至數百言不休。風簷燈檠。蠅頭細字。雖晚年猶把玩不倦。鄉舉勸分立政。郡每誨公董視。取予多寡。一析以理。富者樂於糶。貧者安於糶。上下晏然。如樂歲。庚寅之寇。臨川崇仁為震。大家奔遁。遷徙。鄉氓所在嘯呼。公曉以理法。聯以保伍。遏亂萌。鋤兇孽。環公鄉數十里。恃以無恐。事平。有籍以補授者。公不以為功也。他如去里脊之蠹。興陂池之利。訟平其爭。從寬其期。凡可以利眾及物者。劬勞畢力。不憚。然皆出於中心之誠。然非干譽。非要利。其接姻戚。交鄉鄰。中無城府。外無戟級。懇懇悃悃。人亦樂親之。或以非意相干。笑談排遣。無藏怒無宿怨。人之有善。稱之不容口。聞人過失。必為掩覆。隱匿。且曰。傳訛。未必爾。鄉里稱善人。非耶。娶周氏。子男二人。長即朝瑞。次朝美。先公兩年卒。女一人。胡彌大其壻也。孫男六人。德卿。次即鱗卿。翼卿。鯉卿。新卿。翔卿。女三人。長歸傅。夢得。餘幼。銘曰。教行於家庭。行暴於鄉鄰。古人之所謂吉士善人。不在其身。在其子孫。尚適觀其有成。



黃虎

宋吳泳鶴林集墓誌銘 諸暨會稽大縣也。黃色著姓也。虎公名子文其字也。憲朱氏曾大父母也。瑀贈忠訓郎吳贈孺人大

父母也。祖登仕皇考也。魯氏皇妣也。生而穎悟。莊重如成人。公之幼也。刻苦植學。取友四方。遂登戊辰進士第。公之壯也。調歸安尉。主淳安簿。司雷川獄。知永嘉丞。歸安以憂。永嘉以病。俱不赴。歷任雖四。而僅言六考。公所閱官也。唱第授初秩。薦舉陞從政。覃恩轉文林。致仕改宣教。褫褐幾三十年。浮沉選調。至若告老。始得通直公。所積階也。淳安賦籍漫不可考。吏因爲姦。已輸者復催。公私交病。公曰。勾稽吾職也。出納有令。銷印有時。邑計始裕。吏無所措手。而民安之。乃相邑長大。飭鄉校。群士之秀者肄業于中。士競興學。登於俊造者。跡昔爲多。迨其去也。民懷公之惠。士德公之教。攀留祖錢。充于道周。此公之所以供簿正也。安吉獄市放紛。園扉無茂草。公素明審味。心誠求之。之訓有隸于刑者。臣身親之。既得其情。則曰。此所謂庶戮之不辜也。盛暑給水漿。隆冬給衣被。病則藥之。死則搆之。流徙則計道里遠近資之。皆取諸餼廩。雖桁楊拷掠之餘。無怨言。此公之所以爲司理參軍也。平居燕處。每有常度。家人不見其墮容。訓子弟如嚴師。待交友如同氣。恤鄉鄰如家人。里之孤貧者。嫁娶之如子女。凶年飢歲。以賑以貸。

泥涂斷港。必斃必梁。故邑無流殍而行者不病涉。此公之處鄉也。自安吉罷歸。屏居丘園。十年不調。以書史自娛。邑多佳山水。暇日與親朋盤食。榼酒游適其間。神氣冲澹。一毫無榮進意。端平更化。今參預鄭公。於公爲同年。亟稱其賢。欲薦進之。而公倦游之志。已弗可奪。一日謂其子曰。窮達命也。吾未六十。非不堪事。諸公貴人。非不我知。然此心已在泉石間矣。明日遂上章致其事。越三年而後卒。此公之知命也。甲子三百四十。公所享年也。丙午三月十三。卒之年月日也。是年十一月朔。葬之日也。邑之高額。公所藏也。楊氏先公二十七年卒。元妃也。陳氏後公四旬歿。繼室也。嗣孫免解進士子也。許適衢州教授周輔女也。狀其世系行誼年者。廬陵通守林宋偉也。介參預鄭公之命。俾誌其墓而爲之銘者。同年生潼川吳某也。銘曰。耨之易而未穫。築之勤而未落。高山之陰。陰已合莫。兮。

黃振龍

宋黃勉齋集行狀 君諱振龍。字仲玉。姓黃氏。九世祖自光之固始。從王氏入閩。因仕焉。居言路。有直聲。後遷至中

丞。子孫散處。有居福州城東者。至五世祖。亨有厚德。自奉薄。喜施予。鄉閭感之。號爲長者。曾祖諱祖鈞。父行知。自亨以來。皆能繼其家聲。故今稱長者。



不絕。城東之黃。雖未有顯者。然過其閭者。慕其德。仕其鄉者。亦聞其名而敬之。君天性純厚。襟懷坦夷。樂於為善。聞不善則毅然惟恐晚已。其勇有不可及者。接物無崖岸。與人交久而愈篤。赴人之急。風雨寒暑不避。輕財重誼。親故之貧者。周之無秋毫顧惜意。人有疾病。力能療之。雖貧下危篤。必以身親之。無厭倦之色。親屬隣里。事有難決。即君謀之。為之委曲剖析。納之義理。不可則面折之。未嘗有所遷就畏避也。少力學。自奮為舉子業。必根極理致。不為浮靡徇俗。歲大比。真舍人德秀見其文。奇之。擢之前列。自是切磋往復。遂為深交。嘗曰。三山士友。篤實不相負者。吾仲玉也。晚益收歛為己。慨然以歲月遲莫。後志俗學為恨。日以論語孟子自課。端居莊誦。既又博觀先賢遺言。左右探索。意味有得。輒忘寢食。至朱文公端莊存養獨觀昭曠之原。年事既高。若不着緊用工。恐歲月悠悠之語。惕然有感。書之座右。以自警。深悼少年之不及親師取友也。由是益加人一己百之功。聞四方賢者。必使其子學焉。聚伊洛諸書。課其子以講習。君天資既美。至其知學。則益自力於脩身齊家之實行。故其一門之中。動守禮法。相勉以善。內外雍睦。人無間言。鄉鄰之志於學者。莫不喜從君遊。觀感磨厲。以共扶斯道。而君沒矣。蓋莫不失聲墮淚為之號慟也。君疾革。命取新衣易

之。家人方環立侍疾。君整襟肅容。呼其子曰。養吾疾者。莫若子。男子不死於婦人之手。婦人退。又曰。我死。謹毋用浮屠法。不然。是使我不得正其終也。君之學。既行於妻子。又嘗以朱文公家禮帥其家。使人守之。故其治喪。奉君之治命。惟謹。君以嘉定己卯七月甲寅。終於正寢。享年五十有一。娶潘氏。子男二人。朴。太學生。格業進士。女二人。長許。適進士潘公炳。次先卒。孫男一人。壽老。將以是年十月二十二日葬于閩縣橫嶼山之原。二子以君之行不可無述也。固以請。幹與君交最晚。於里巷交遊間。知君之行最詳。既喜其稟姿之粹。務學之實。其於死生之際。又能不溺於兒女繫戀之情。夷狄荒幻之教。而孚於家人者。又如此。因其家以驗其行。即其終以信其平昔。是不可使之泯泯無聲。以昇來人。遂述其梗槩。俾求銘於當世之君子。謹狀。宋真西山集墓誌銘。始予考大比。試于三山。得閩邑人黃仲玉。文卷於紫百人中。獨平澹有理趣。曰。是必佳士。既訖事。人為予言。此城東黃氏子。其家以長者名數世矣。明年予入連率幕府。仲玉升堂拜予。親自是日與之游。見其眎瞻瞭然。襟抱豁然。聞人善不翅如在己。親若故。有窶貧者。調之無不至。鄰里有疾。苟力所可拯。雖貧賤困篤。必以身親之。與人謀忠而盡。於是知君不惟文藝可觀。而行誼之美。益稱其為長者家也。



又明年予遂登朝。閱之士病於計借之員狹也。凡能操觚吮墨者。鮮不奔走求牒於四方。予官中都八年。力能爲君營一試。而君俛首鄉貢。寧數不利。未嘗肯予謁。又以知君於得喪澹然。有君子之風也。君自少銳於學。晚益喟然。以未聞道爲憂。日以論孟自課。既又博觀先賢遺言。左右探索。意有所得。輒欣然忘食。至朱文公端莊存養之說。嘿契于心。大書座右。以自警。勉齋黃公幹。文公之高弟弟子也。君驟從之游。請所未悟。黃公亟稱之。謂其可與適道者。又益知君不以行義自多。而用力於學。必求詣其極。而後止也。未幾得疾。以嘉定十二年七月甲寅終于家。年僅五十有一。方屬續時。命取新衣易之。家人環侍。君正襟肅容。呼其子曰。養吾疾者。莫若子。婦人退。又曰。我死。謹毋用浮圖法。不然。是使我不得正其終也。嗚呼。非賢而能之乎。或曰。以君之材。而不仕以死。爲可悼也。予曰。仲玉之所憾。豈此耶。古之君子。俛焉孳孳。斃而後已。豈爲利祿計哉。曾子曰。而今而後。予知免夫。子張曰。君子曰終。小人曰死。吾今日其庶幾乎。夫全而歸之。乃可言免。無媿而死。乃可言終。士之終身問學。求如是而已。曾子躬三省於前。而悟一貫於後。蓋信乎其免矣。子張之仁有所未足。其於終也。果能無憾乎。然則以仲玉之賢而死於布衣。仲玉不恨也。進道方勤。而命弗淑。君子蓋

深惜之。君名振龍。仲玉字也。其先自固始入閩。五世祖庸。輕財樂施。長者之稱。自是始。曾大父某。父某。雖潛閎不耀。克以厚德世其家。媿潘氏有賢行。子二人。曰朴。太學生。曰格。業進士。是年某月日。葬君于橫嶼山之原。予知仲玉者。故爲之銘曰。昔未識子。子文我評。及既識子。我懷子傾。今者奈何。子藏我銘。執筆慨然。我涕子零。嗚呼傷哉。

### 黃雲龍

宋趙儀可青山集墓誌銘 君義城黃氏。諱雲龍。字君從。取山谷養生四印語號四印翁。生嘉定庚辰。三歲而孤。繼

母劉南城大夫諱良之女弟也。以君依外氏教養。君亦自力於學。家事惟二兄相繼逝。君撫其孤。室無私財。庖無異饌。諸姪繼成立。乃取先疇均之。使自爲業。卜築桂川之祖居。課督諸子。夜分不寐。月書季考。責其自試。寧不中。不求師友。潛救爲欺。以是諸子皆能爲儒。按察使行部試士。成居然穎拔。明允仁允。亦有名鄉校。君既歸。舊隱日與同味。爲樂。橘中梅下。頽然天嬉。生平不事生業。室常罄如。然宿舊過從。不見偏反意。或有所求。亦無不滿意去。見好書。雖乏絕。亦解衣緝之。如不可已者。性厚重。然義所當爲。浩然不護。豪富侵先業。衆曰。是不可與爭鋒。君雍容求直。卒得直。有犯其



高祖瑩者。銳身爭之。雖繇此為怨家。燬其廬不悔。噫。所謂勇者與。君於醫尤妙。解施病者藥。雖深夜叩門。應之不倦。為產科書板行四方。歲飢。問糶者。減直以售。惟自恨力不裕。所及不廣而已。聞葛仙翁煉度可生死人。歲亦再行之。苟可濟物。無不為也。晚從方外友。將入玉笥山學道。而已病。然猶手集易傳。未半筆絕。丁亥正月六日歿。曾祖安漸。祖令猷。游揚誠齋。謝良齋門。父平。妣劉氏。娶李氏。繼程氏。又繼劉子男三人。惟賢成也。齊賢友賢。明允仁允也。孫男一。孫女二。諸孤以至元己丑十二月丁酉奉柩葬桂川之西園。惟賢求請銘。銘曰。幼而孤。老而不能期。願忍默平直。埋於斯。

### 黃必達

宋林光朝艾軒集埋銘 黃氏子汝嘉。讀書城南。與其弟汝宅有所請於余曰。汝嘉不幸幼孤。是時汝嘉未齒。汝宅為乳下兒也。昨來道旁。得尋丈之虛。可以葬先生。肯為之銘。則是若有所待也。此葬不為緩。一聞是語。愴焉於余心。使列其所從來營道。公死於官。所有子纔四歲。是為用時。用時二十九而卒。件件自琢。削解為塲屋語。是用時不待父之教。汝嘉弟兄。又不必用時教之。此其愴焉於余心者。用時娶方氏。諱必達。掩土二十日矣。坎之外有尺寸未補。得是銘即埋之。銘之曰。孟之隄。乃卒事。謂是銘也。其勿毀。

### 黃如愚

宋陳藻樂軒集坎誌 蘇田之黃。敵為別祖。蓋自候官黃岸析之而來。其後有若叔豹。有若發者。嘗於太學里。選有聲稱。秋卿諱如愚。徙漁溪。其去蘇田之別為十二世。乃將仕郎毗之長嗣子。享年五十有八。以甲寅之夏歿。男女林氏所生。少公四歲。而其歿也。後之五月。戊午。季冬壬申。同坎于東洋之陂。嗚呼。死之日。若水有婦。其甥一林賡爾。四女以次主家。營治嫁禮。若有怙恃。森與若水。修進士業。出以意氣自負。而入待其姊妹。怡怡如也。小人於是乎服公。盜謗不過。而儲用未匱。君子於是乎察。友睦天性。而亦公之有義。方曾祖仲虎。祖某。前醮廣州節廣推官陳寬女。妣林氏。後公逝先一旬。而合厥考之塋焉。銘曰。年垂六十。送母不及。旬日有奇。兩山峙立。魂識往來。母笑前泣。有之固然。散也為入。

### 黃雲

宋葉水心集行狀 紹熙五年秋七月。庚午。黃子由自嘉王府直講。為起居郎。無權給事中。踰月。遷中書舍人。兼侍講。時國有大喪。內禪甫定。諸處分尚多草創。人心憂恐。天子思盡下情。博謀群臣。於三宮僚尤委信。或一日再宣對。子由素負直節。激發敢言事。事有未便。常爭



論上每爲順聽。一時甚賴之。知子由者。不以遭遇萬一遽至顯用。爲子由之身榮。而以子由能竭誠不阿。補益上初政爲國家喜之也。冬十月庚寅。子由以父喪去職。於是知之者。又皆痛惜以爲天下且假其父之年。而令於此時得疾死。何耶。知子由之父者。則又曰不然。是翁奮立寒苦爲鄉先生。天質疎宕。不避就向背。教子必自達於義。晚而後得仕。仕不盡其能而死。是可痛惜也。焉得但以子由一時去職爲重而痛惜之哉。明年子由使其弟田來曰。將以慶元二年三月某日葬吾父於吳縣至德鄉觀音山。天乎。往而不復反也。圖以永先人之存。詔無窮之哀。宜莫如有以述也。惟荒蕪迷塞。不能次第其辭。而以屬於子也。若何而可。余念去歲臨於重華。旦晡輒與子由同待事殿門外。一日子由出家信數通徧示諸大夫。雪涕曰。吾翁官建。勤疾病矣。而易月之練方畢。家事義不並。柰何。宰相聞之。予告往省。上時猶在嘉邸。大書成齋二字。令以賜翁。成齋者。翁爲鄉先生授弟子。經時所名也。至則翁疾良愈。遂奉以來行在。及子由入見。上先問翁動息。曰。總幹已無事耶。已安樂耶。子由頓首謝。歸道上語翁。歎曰。士不遇巖棲谷隱。姓名淪滅其常也。今以蓬門被雲漢之章。野人致天帝之問。吾爲賴寵乎。故子由驟用。時適多事。而翁誨之曰。惟苦言可以報國爾。親爲視

表章。或具草使上之。子由固喜忠義。然觀翁意。雖有可以回曲保榮利。亦不願其子爲之也。然則知之者。所以惜子由之去而哀翁之死。不虛矣。翁死。上遣中使王德謙賻。舉朝皆弔哭。喪還。赴於塗。哭於郊。弔於家者。相屬也。且翁父子既逢時貴重。而其生死之際。又爲時所痛惜如此。今子由欲永先人之存。詔無窮之哀。是則述之大者已。以首於狀。可也。君諱雲。字鼎瑞。吳郡人。世農家。未有仕者。君幼自知學。年十二三。已能授童子書。既冠。入太學。文義益通達。吳中大書會稀少。至君學。成。後生慕從者常百餘人。勤苦誘掖。一變口耳之習。薦第有名。多君門下。它師不敢望也。考官戲曰。吾爲黃先生取士。爾嘗徹舊宅。將新之。夜半鄰近驚曰。火且作。視之則有光發其楹下。或以告君。君卧自若。曰。有是乎。告者益衆。曰。火且作三矣。君徐起祝曰。吾及兒子幸爲儒。它日以是試之。可也。未幾子由以對策言直。得賜第一人及第。君所對尤切。亦欲以冠。特奏者有不喜。曰。少戇矣。猶寘高等。時淳熙八年也。調永州祁陽主簿。簡易廉直。民愛敬之。辟監建康酒庫。人謂君酒碎務。何得自屈。君曰。吾豈以儒者薄是官。投明坐爐下治之。逾謹。諸司更薦君。一一俛受。至當改官。乃自言老病不願。遂以通直郎致仕卒。年六十四。娶李氏。有婦道。窮約中能助君爲善。再娶劉氏。並贈孺人。



三子。子由長也。名由。為朝散大夫。試中書舍人。兼實錄院。同修撰。兼侍講。次申進士。次田免解進士。女歸迪功郎台州天台縣主簿趙汝泌。君坦蕩不為限級。遇人無新舊。樽酒盡歡。財物到手。與親友共費之。下田供粥糜而已。而有至性。四歲喪母。鞠於莫氏。其考復聘孫氏。從而室諸。有弟曰茂。君日自莫氏往來。寧其父母。退而撫茂。風雨不懈也。孫氏又死。君迎父有弟。己之服具。使茂擇取半焉。茂又不振。君復空舍納之。衣食居處無間也。劉氏故適士人。夫死。父尚殯。姑老。二女幼。乃改事君。君為葬死者。養老者。經營其女。各有歸焉。有文二十卷。詞詠從容。每指其心而言曰。是方寸地。豈可忽耶。慶元元年九月日。朝請郎試太府卿總領淮東軍馬錢糧葉某狀。

## 黃榮

宋袁潔齋集行狀 公諱榮。字子邁。其先發州金華人。有仕江南者。以著作郎宰分寧。樂其土俗。因徙居焉。分寧之四世孫朝

散大夫諱湜。以儒學奮。一門兄弟共學于脩水上芝臺書院。道義相磨。才華競爽。時人謂之十龍。後登第者彊半。朝散之長子曰康州太守庶有詩名。實生太史氏庭堅。朝散之次子。公之曾大父也。諱廉。熙寧元豐間。屢將使指體量京東河決。活饑民二十五萬。官至朝散大夫給事中。贈少師。妣

楚國夫人劉氏。南康高士太子中允渙之女。大父諱叔敖。政和中將漕湖朔。跡廉訪使者李滋之姦于朝。黜隸衡陽。時論快之。紹興中。為戶部尚書。徽猷閣學士。左宣奉大夫。贈少師。妣秦國魏國夫人。皆李氏元配尚書常之女。繼室郎中莘之女。二父俱有盛名。東坡蘇公賦詩。所謂何人修水上。種此一雙王者是也。考諱彰。守袁永吉三州。皆有惠政。官朝請大夫。贈通奉大夫。妣碩人夏氏。九江使君倪之女。使君之名見江西詩派中。公既生長名族。而外氏又皆當世聞家。耳目所接。典刑猶在。清標勝韻。自然逸群。讀書往往成誦。落筆無世俗態。以通奉公郊恩補將仕郎。未幾丁外艱。執喪以毀瘠聞。既即吉。哀慕不衰。再閱歲。始以易試銓曹。占高等。時戶曹闕。筠最近。吉倍之。公應得筠。或言親老且貧。不堪淹久。幸避我公與之。非雅故欣然許之。即改注吉。部胥相顧駭曰。聞有急近次而爭者矣。未聞有遜人者。未上。丁太夫人憂。服除。主吉之龍泉簿。吉大邦田租之輸累巨萬計。姦弊總總。郡檄公莅之。始至。吏或密請使令。公瞪視之。請不置。訪其故。乃前此有吞其飲器之餌。拱手聽所為。莫敢孰何者。一日復請公數之曰。爾謂我不知耶。吾忍而不發。不欲暴前官之短爾。亟去。無污我。遂罷遣之。擇愿吏平槩量。除常歲多取之虐。人情大悅。會邑長病。不任治劇。郡俾無



領。公敬長如舊。事必咨焉。宰感悅。歲餘以憂去。公竟補之。葺學宮。增弟子。負。立程蔡呂先生祠。示學者以趨向。建梯雲橋。民不病涉。創大豐陂。溉田二萬頃。慮其久且廢也。買田十畝。山九百畝。以備修築之費。立長若副。分番掌之。以均工役之勞。隄防周密。遂為長利。侍郎孫公逢吉深歎美之。為識其事。以誌來者。嘗出見民有空舍。老嫗卧其下。旁無一物。屋猶堅壯。心疑焉。使人問故。嫗曰。兒買人。將鬻此廬。以就婦舍。嫗弗忍也。甘此獨卧。公驚歎曰。誰有此風耶。立逮其二子俱來。一寔且瘁。一壯而悍者。賈人也。公曰。此豈待考掠而得其情哉。欲寘之法。嫗以天性之愛。祈免甚苦。賈人亦痛自剋責。請後不敢。公因其機而訓飭之。母子於是不睽。寺簿劉公清之。以此古循吏。篤於風教者。因贈行。述其事於詩。以美之。再調汀州。蓮城令。創邑纔六十年。介萬山中。民俗犷戾。一語不相能。即挾刃相向。縣以包鹽為課。北園悍甚。稍追呼之。群聚發矢石。官莫能制。公曰。豈有具耳目為人。而不可以善化者耶。乃出版教諭之曰。汝內郡良民。非居八荒之外者。負固若此。如王法何。令尹甫到官。吏首言。汝鄉不輸官物。不請包鹽。宣一繩以法。令尹弗忍。是用誨汝。其自今盡去舊習。輸租以時。請鹽以額。縣不汝逮。且率先者賞。民喜。更相語曰。今令尹不我棄。善教我矣。是吾父也。父可

捍乎。獨何澄者。實為首惡。公請于郡治之。如法。自是無梗政者。大修學政。增益棟宇。厚給生徒。屬尉薛士穎以訓導。而時時躬勉勵之。視龍泉有加焉。士知向風。始有與計偕者。縣圃有松。老而連理。公名之曰義松。取先太史翊真觀義松之作圖而刻之。邑人歌誦。謂公德政所召。龍泉及是邑。皆立祠以奉焉。改宣教郎。知湖州歸安縣。近輔劇邑。多貴臣大姓。素難治。平心處之。既不肯吐。剛茹柔以自欺。亦不專抑強扶弱。以自異。巨室有訟。理不直。而以私請。一斷以法。僧為惡。少所誣。脅取財物。無以自明。立伸其枉。催科甚寬。而信寬。故民力可辦。信故期會不可違。公私兩便。足為世法。女巫游僂夫人者。誑惑寓公。達于官府。公判其牒云。信巫不信鑿。此愚俗之病。衣冠右族。豈宜淪胥。淫祠不毀。蠹民益甚。廼杖其人。而盡取其土木偶。投洪流中。及其他挾邪術惑民聽者。一切蕩刷。無遺類。巫風遂息。既解印。貧尼其歸。僦居郡治之側。吳興士大夫敬之不替。客或過之。曰。為邑者。幸而終更。恨去不連。惡人之厲已也。今公寓是邑。而邦人加敬。則必有道矣。公曰。吾滯于此。囊無餘貲。爾豈意得此於茗甞之人乎。部使者交薦。有旨堂察。尋幹辦諸軍審計司。公之為邑也。每患民有艱厄。力不能贍。及是面對。首言祖宗盛時。京師有福田院。諸路有廣惠倉。愛惜生靈。恩深澤厚。薄



乎天淵。今州縣煎熬。素無餘羨。金穀出入。悉有成數。其或水旱間作。疫癘流行。雖有良吏。盡心力而為之。所及幾何。甚非陛下愛養元元之意。竊見州縣多沒人之產。非豪強請佃。則形勢侵冒。時或鬻之。欺弊萬端。黠胥納賄。浸成乾沒。於公家何補。謂宜根括諸路。凡未鬻之田。與相繼沒入者。別為一籍。許見佃。及旁近良民之願耕者。各抵其鄉斗斛輸租。為歲災之備。病者有以鑿療。死者有以葬埋。責守倅令。丞掌之。如常平法。時論譴之。遷軍器監主簿。轉為丞。又遷司農寺丞。武臣有部綱無折閱者。吏不與批書。及鈔。反以法不得部運押之。公言於長曰。上官不察。使使下位。彼安敢辭。事幸而集。顧以為罪可乎。長深然之。即日給鈔。且為申明。使得霑賞。時詔許百官上封事。公言前後臣僚奏陳。多切於今日者。言而不行。行而不力。雖日有總章之訪。無益也。不若行其所未行。力行其所已行。則政治有日新之功。而太平之基立矣。遷太宗正丞。涖職之日。吏以知宗已施行事。請同書之。公曰。官必有屬。正欲詳輕重。度可否。而後白長官行之。法也。惜不知何事而苟焉書之。可乎。曰。例如此爾。公曰。審如是。一知宗足矣。何以承為。吏不能對。自是事必先白。攝司封郎官。朝旨委糴米三十萬。經畫有方。未三旬而足。居數月。除大理正。兼官仍舊。公言故事未有以理官兼他職。

者。力請補外。除浙西提舉常平茶鹽事。陛辭。乞取百司省記條付。勅令所刪修。可行者明著之。令。不然者去之。毋存此名。以惠姦吏。上可之。既至官。建請僧牒五百。易緡錢四十萬。糴米十七萬。有奇。以備歉歲。謂義倉所儲。不應混於省倉。則為甲乙。曆頒給所部。日入米若干。謹書而別貯之。毋得侵用。謂浙右鹽本不足。貫於亭戶。商人輸錢而後償之。平居無以自給。私鬻者眾。則多方經營。務殖其本。先期給之。謂鹽場闕官。法許無攝。勞無賞。虧有罰。非所以勸。請計其日月。推賞與正負等。遂著于令。時陳便宜者。或請斷諸港。以絕私販。朝廷施行之。公言浙西支流甚眾。小人競利。朝禁暮撤。私鬻未戢。而日治撤防之罪。祇益其擾。命工圖寫曲折。力為廟堂言之。乃止。後法不均。民多囂訟。公諭令丞實其物力高下。參以歇役。又近聚廳。定差後。有訴不當。而果然者。令丞坐之。置東西義廡。以收遺散。創居養院。以處孤老廢疾。仍嚴不舉子之禁。滿歲召為郎中。入見。乞增減鹽額。其說曰。鹽課之虧。由未明通變之法而已。因產多寡。立額輕重。祖宗之意。夫豈不善。然歲月既久。風濤不常。斥鹵之地。亦隨而轉。產有增損。之殊。官守一定之額。故有增於舊而額尚低者。亦有損於舊而額猶高者。低者其額易足。鹽雖有餘。官難強買。往往於私自售。高者其額難及。不足則有罪。私販



亦有罪等罪爾。孰若私販之爲利。官課陷失。職此之由。且以浙西言之。臨安巖門。錢塘仁和等處。歲增數及七八分。常受增秩之賞。嘉興之下砂。砂腰青村等處。歲虧數及九釐。常受衝替之罰。豈受賞者皆能吏。而被罰者皆庸才。地之所產。今昔不同。而法之通變。或未之思爾。臣愚欲乞行下諸路提監司。取各場歲帳。就與推排。十五年内皆增。取其中數。立爲定額。十五年内皆虧。念其難辦。特與量減。取彼有餘。補此不足。誠爲均一。臣又嘗觀江淮守令。亦有如此增減者。若推排無私。陞降得實。則諸場無課額不均之患。官司無賞罰不當之失。遷吏部郎中。有以鬻爵得官。援十二年減舉主改秩者。吏得所欲。請與之。公曰。是別有條。欲減舉貢。倍其年。可也。其精明類此。除樞密院檢詳。踰月。無都承旨。時邊事繁興。盜權者欲引公自助。公不然之。遂大與忤。密院施行。皆由吏出。公曰。吾豈可復在此位耶。力求去。以爲右司郎中。尋將指江壩賑濟流徙。至金陵。閱寺觀。中僵尸枕藉。存者僅有餘息。而來者纍纍未已。公慨然曰。是救焚之時。曾子固河北救災議可行也。先是朝旨。人日給米二升。錢二十。公與留守徐侍郎詎計之。曰。是以勺水救涸轍。可濡頃刻。不可以活。請口多者月給之。寡者併兩月給。徐公恐無以繼。公曰。不然。月給之。彼終日饑仰。此爲哺所及。微矣。併與

之。彼得以展轉自營。不猶愈乎。會副樞丘公崇赴鎮。公迎謂之曰。紆一旦之急。將明者之責。還定安集之政。在制聞矣。丘公異其言。屏騎從。至館寓。促膝語甚久。公因勸以收集潰卒等事。丘公然之。使還。屬時更化。朝論知公植立之正。仍爲宰掾。嘗白當路。四方奏報稽留。何以責稟令者。今輩下死囚俟報。或幾年不下。况遠方乎。於是以公兼左司。公念省司繁重。日力不逮。率以清夜。端居靜室。秉燭炷香。躬閱獄案。默禱之曰。若有冤。當使我心目豁然。盡得其情。至操擬筆。則又曰。汝當死矣。其信然否。取案再閱之。猶幸其可生也。至事干名教。亦不苟貸。一婦人欲殺其夫。毒所饋羹。夫未及食。他人索之。婦不敢言。竟以此斃。獄上以無意於殺。得不死。公曰。此人之死。雖非婦意。獨不欲死其夫乎。茲不可及之大者。卒論殺之。遷太府少卿。未旬。決。除中書門下省檢正諸房公事。虜始修好。以爲接伴。使舊例。前期一月。被命。得以參考故實。講求典禮。時廼初使。且趣行甚急。或謂公何以應之。曰。吾應之以理而已。既至都。梁兵革始息。饑民滿野。傾囊中。齎易鐵錢分給之。北使踰淮。以錫燕撤樂。疑不即赴。官屬不知所出。公諭之曰。本朝成肅皇后几筵未撤。皇帝未即吉。國樂未舉。非有他也。且北使值國諱日。猶不與宴。况於國卹。重輕較然。尚何疑乎。北使矍然聽命。送伴至



京口道千秋橋歸正人之子陳亨者。遮道疾呼稱歸朝人。北使欲與之語未及也。比入館。將命者以爲言。公曰。適與中所見。一病風狂夫爾。驚動信使。皇恐官府已懲治之。曰。非爲此也。承命而來。謂用兵時。恐國人有軼於南者。因令體訪。今斯人有歸朝之語。故欲面叩之爾。公曰。此非送伴所敢與聞。朝廷盡索北人發還已竟。假有存者。拘轄必嚴。詎容輒出。其非倖掠明甚。國信必欲見之。當以聞于朝。獲旨而後可。其人語塞。求一紙道所以然。歸以爲驗。公令述其事付之。詞約指明。聞者自屈。廟堂加敬愛焉。有武臣自陳求路鈐者。閱其資歷。雖已更數任。而居官任職。實不過一考。公曰。此乃以計取朝廷名器者。兵鈐可處得耶。亟令赴部注合入闕。錢塘富人錢氏子。詣省授例乞書填叔父輸粟軍前所給綾紙。同列將從之。公不許。曰。是有可疑。他人爲請甚力。卒不許。後一時授官者。例以僞獲罪。而是子以不書填也。獨免。除直顯謨閣。兩浙轉運判官。尋陞副。愛惜財物。一不輕用。惟救民病。卹死喪。無所靳。嘗因護客。見挽絳者。踏冰雪中。深念之。及是應辦爲置絮衲。別給雨具。而厚與之糧。自都至京口。令所部郡邑覓挽路。人不知泥滑之苦。虜使見亦嗟嘆。還大府卿。寺事多隸版曹。惟和劑局專領。往時藥物取諸雜買場。不即與直。商人憚與官市。故藥多闕。闕而求之。

其價輒倍。公乃命場吏有所藥售者。並齎錢楮與偕來。吾面給之。商人麇至。率得平直。廟堂喜曰。使居官者皆如黃卿之爲。何事不辦。每歲頒藥兩總所至。局如中都。官吏供億。徒有重費。請從本司自遣人至彼鬻之。歸其直於局。朝廷從之。太府司農二寺軍器。將作監歲久頽毀。公建議勿葺。而徒諸韓氏故居。又遷和劑局與外府鄰。以便檢覈焉。輪對稱今兵革重費之餘。朝廷日夜所憂。莫急於治財。而財所從出。未有不取諸民者。今日民力。豈可復困。要莫如省費。一費省。則一利積。朝廷及州縣冗費皆省。則在有積矣。又言春秋傳記楚子入莒。莒以城惡而潰。比者襄陽維揚城守不可犯。全椒儀真蹂踐於虜。可以爲鑒。故修城爲當今急務。而議者必謂大費。非今所堪。臣觀漢世役民多。取諸有罪者。今黥卒布天下。用以修築。毋責成於一切。而使後人續之。秩滿具數來上。自此天下皆堅城矣。上施行之。公屢請補外。朝廷雖黽勉聽去。而猶未許。就開除淮南轉運副使。無提刑。趣之就道。加秘閣修撰以寵之。北方倣擾。使不時至。浮言扇動。富商有束擔理柩而他之者。公廼治圃修橋。示以閒暇。而內謹防托。人情按堵。隆冬冰淮。千夫撞之。僅能移駕。公因廵歷疏決。有爲人誣翹而反繫其父子者。有誣以私販沒入財賄。而猶桎梏者。有罪不至甚而踰年不決者。人



人閱實。又相視築滁陽城。遂感寒疾。及遷治所。楮令方新。民間閉市。公猶力疾慰安閭巷。出鐵錢收舊券。發倉實。平糶價。列肆旋復。百姓益喜。而公病深矣。嘉定四年正月十日。竟至大故。壽六十有一。積階至朝請郎。准人老幼出涕。元夕舉市無鼓吹聲。蓮城之民。思其遺愛。聚哭于所奉祠下。而又奠於臨川。此足以知其至誠感人有不可解於心者矣。宜人徐氏朝請大夫。鬱之女子三人。壻迪功郎監鎮江府都酒務。崖將以遺澤補官。坡先六年卒。女三人。長適修職郎新岳州華容縣尉洪慥。先公卒。次適從事郎新袁州宜春縣丞燕季子。次適承直郎監池州城下稅務王梃。孫男女各一人。諸孤將以七年某月某日奉公之柩葬于撫州臨川縣天堂之麓。公資性篤實。用心於內。不汲汲於榮祿。初試吏時。侍郎劉公穎持節江介。諷公達意於帥樞王公簡。同薦其才。公耻自媒而止。後為列院參政。婁公時為同舍。見公造請希濶。深愛重焉。及丞戎監。同列有貴家子阿附權要。語公曰。人之所趨。不得不趨。第俛首一見。美官立可得。公正色曰。君可往。某則不可。觀風浙右之日。有蘇師孟者。黃鵠師且補官。占一卒養私馬於官廐。公曰。是敢爾耶。沒入之。黥其黨親為吏而犯法者。師且雖含怒。公弗顧也。方群陰用事。則介然自持。及公道復開。亦恬然無愧。名流以是推之。每

謂公若不限以科第。豈容我輩獨在臺閣。公曰。假令某以科第進。亦必不在臺閣。居朝列十三年。循序而陞。未始超越。故制詞有云。安於平進。澹然無營。起居王舍人。介稱其明白洞達。禮部倪尚書思以先太史勉之。深感其言。服膺無斁。謂子弟曰。先太史名播海內。而官不過貢郎。位不過著作。今吾德業未克而祿位過之。豈不有愧。汝等但宜篤志力學。毋更求過於侈靡。其有定分者。分寸不可彊。枉尺直尋。徒喪所守爾。公之立身垂訓。大槩若此。尤隆於友愛。兄將效官夷陵。未至而沒於荆南。子幼。喪不能歸。公馳赴之。經大澤中。迷失道。聞關久之。始得草廬宿焉。或告曰。虎方食人而去。瀕於殆矣。而無他虞。若有相之者。既達江陵。復走數百里。從親舊假貸。諸公多其誼。爭餽之。躬護旅襯。挈其家而歸。既畢。寔空。餘助昏嫁。族黨姻戚急難之際。鰥寡孤獨之家。分俸給之。有捐數百金者。家藏山谷。與族弟靖民判官帖。謂吾儕所以衣冠而仕者。豈已力哉。皆高曾以來積累所致。冲和之氣。偶在此一枝兩。其實相去不遠。每過馬鞍墳。未嘗不愧汗也。常誦斯語而敬行之。又摘冲和二字。求東宮大書以名其堂。攻愧參政樓公記之。平生不治產業。惟法書名畫古器物是好。一日得山谷帖數十卷。直千金。傾橐而償之。對客卷舒。津津喜見眉睫。曰。吾不貧矣。又樂與名勝



燕集不計費。故其家屢空。士人或獻詩云。官大屢持節。家貧猶典衣。公曰。此子善形容。我者家藏書。餘萬卷。縱觀博采。苟片言有可取。亦誦味不休。詩律字體。大略祖述山谷。而時出新意。自成一家。大字尤奇壯。東宮欲見之。書中庸大學以獻。既覽之。喜錫賚良厚。其所稱舉。皆當世佳士。中書舍人陳公希憲嘗稱仁和丞老成練達。為求表薦。既許之矣。會陳公卒。有欲攘之者。公曰。吾豈可以生死貳其心哉。卒如初諾。風規秀整。進止安詳。朝會立大廷中。紳綏屬目。嘗於夢寐中與神人問答。皆達生語。其少也夢游大官府。丹碧晃耀。與塵世殊。金書淮南二大字高揭其上。戊辰之歲。護客維揚。仰視所揭。適與夢符。歎曰。人生萬事。莫非前定。今日駢馳王事。乃兆於四十年前之夢。信不偶然。將漕于淮。竟此易箆。是豈真有數耶。年不配德。飛不盡翰。賢士大夫皆傷惜之。雜著二十卷。介軒詩詞三十卷。藏于家。某頃克負樞屬。公為檢正。率數日一見。見即傾倒。磨切講貫之益。深契此心。後官臨川。二子護喪還里。追念疇昔。令人賈涕。二子屬狀其行。顧惟荒陋。未敢許。葬有日。不遠千里。走介遺書。具公行已居官本末甚悉。重以為請。乃為之槩括而教授之。予以求銘。必有能發揮盛美者。謹狀。

## 黃濟叔

宋牟巖陵陽集行狀。先生姓黃氏。諱某。字濟叔。隆州井研人。其先自金華入蜀。子孫散居。卽資隆三郡。而隆之族

為大。四世祖遷。登元祐三年進士第。元符中以選人上書。詆時宰。名在黨籍。曾祖考時敏。三冠里選。嘗著易通。六經釋疑。號為博學。祖考順卿。與兄朝卿。同舉于鄉。里中稱雙鳳。朝卿後登紹興二十一年進士乙科。為青神宰。考子說。性剛介。青神當磨勘。朝奉郎告且下而卒。無子。或謂君宜亟圖之。庶幾賞延者。君正色持不可。以為難。曾祖妣陳氏。祖妣喻氏。妣王氏。先生生於慶元丁巳。髫齡嗜書。十九喪父。哀毀柴立。免喪。即負笈游蜀。學成都石室羣。四方士殆萬數。先生試輒上游。已而歎曰。是不足為吾學。歸閉戶窮經。貧益甚。學益苦。從之遊者日益眾。普慈素多士。歲率以夏秋之間。為講會。坐臯比者。皆宿學大師。士不憚晨糧。競往聽。先生持所見與之。相叩擊。連柱五鹿君會。下竦服。早游秀巖東。憲二李先生之門。而某之大父雪溪公。先人存齋公。尤敬之。奉書幣。延致家塾。先生以師道自處。誨諸生有法。每講誦。過夜分。未嘗假以詞色。諸生一笑語。稍譁。一步趨。稍異。一容止稍慢。先生輒厲聲呵責之。人謂焦先生弗足過也。大父即世。與先人俱東。流落阨窮。有不堪其憂者。二老方相與。紬繹經傳。攷訂同異。以不足



日爲事。其後先生家于吳。書問往還無虛時。歲或一再過。先人留輒累月。子弟奉中履侍左右不敢怠。與先人道同志合。每相規以正。先人立朝議。論或抵忤。先生輒喜。聞其得請去尤喜。諸賢聞先生。行誼皆願交。退庵吳公。朔齋劉公。雙溪李公。前後交聘先生。獨從朔齋雙溪。而於朔齋尤久。朔齋以文墨稱一時。往往質先生而後出。先人守當塗。先生已倦游。強以往。凡書翰墨以煩先生。嘗建小學。屬先生爲之規約甚備。先人得罪權貴人。歸卧茗雪。先生亦杜門教子不復出。先生連蹇名場。淳祐癸卯。甫薦江東。景定壬戌。以累舉當入對。諸老力勸之行。會有旨。縣學皆設官職。教時郡博士先生得主慶元昌國縣學。昌國居海中洲。學雖具而無教法。先生首以白鹿洞規從事。升堂講學記。一則使學者先知學之所以悞。與其所以學之序。自是朔旦輒講。反覆推盡。不爲空言。學者翕然以得師爲幸。間復嚴課試。歲終則校分而升黜之。學廩舊縣令持簿書願并屬先生。先生力却之。母慮十數反。曰。君任養。吾任教。母相殺可也。令不能強。始至無所舍。有夫容洲屋僅三楹。上雨旁風。先生請于縣。捐奉撤而新之。復增堂皇。公居以爲來者利。一不以擾縣家。丞相西礪先生葉公時在郵閩。得先生講義。大加歎賞。即書其櫝曰。學問深醇。講說明暢。堪克經術精通。可備講讀。

科。且將及春而舉之。會先生解去。弗及用。咸淳以覃恩循脩職郎。再調台州寧海縣丞。丞廳歲催役錢。爲關子九萬有奇。人逆憚莫敢向。婁吏聊攝弊益滋。積逋如山。而諸吏攬上戶相表裏。不可問。甚者去其籍。先生究知其病。力乃條畫詣郡白之。且曰。州縣母子相依。痛癢相關。盍立定期。毋專痺乎母。徒因其子。守戴侯恫一始見。輒握手論文如舊相識。留之幕府。先生力懇遂曰。丞雖卑。吾職也。敢曠官乎。侯益敬歎。先生所請悉行之。至邑。則戶予一青冊。使有鈔者銷。無者納。未幾負者畢輸。解新補舊。不督而辦。下戶預借之弊盡革。先生初與二卿家公同寓吳。幅巾短褐。日相從蕭寺。公性高簡。不可一世士。獨敬先生。二子頤山坤翁。則堂鉉翁。因與先生厚。至是則堂提點本路刑獄。首問先生所在。婁羅致不就舉。以關升。應詔薦士。復以先生爲首。曰。學有淵源。文有楷法。持論堅正。制行潔清。早登西州諸老之門。獨擅汝南。且評之譽。蔚爲人物之表。宜備師儒之官。其相推重如此。趙侯子寅求爲守。未識面。亦以所知舉先生。寧海爲葉公通德里。公角巾還第。先生候之郊垌。公猶不忘。昌時一見喜甚。摘賞贖文警語再三。間語其鄉人以先生學問操履稱之。不容口。迨解歸。公復貽書中朝。相料理。而先生已無意榮進矣。過越。則堂力要權檢法官。先生亦爲之盡心獻



議務得其情。使者出循部。先生留司吏抱成案促詳覆。驛致行司。日不下十數。積先生剖折詳明。傳以經義。多所平反。壬申秋。則堂召而某繼之。辭不獲命。先生知某當來。趣為裝將歸。某亟書丐少留。願受教。先生曰。子以一致之性。處群物之會。吾為子懼。雖然。勉之。無負所學。時雲巖先生洪公起帥。越無庾事。雅知先生。辟茶鹽司。準備差遣。幕府省文書。日與同寮賦詩飲酒為樂。退輒掩關。饋問不通。門無雜賓。郡有西漢書板。脫誤踏差。幾不可讀。先生欲白府刊正之。適洪公以真文忠所編文章正宗屬先生校讎。先生曰。是吾志也。乃并漢書白之。即倉司置局。字字參訂。雖盛夏弗置。所釐正藁已具。未刻梓。先生忽感風眩。謁告少間。猶自力擬文檮。閱書策。應人事如它時。時先生二子請舉江東未還。某徃省。先生使人逆拒之。因屬先生之姻楊君明復。晝夜視先生。先生謝醫却藥。曰。吾無所苦也。一日與楊君坐語至暮。忽痰薄咽間。疾復作。竟終於官之正寢。癸酉九月乙酉也。某以諸生。實制服受吊。洪公尤嗟惜。贈賻特厚。且經紀歸其喪。先生性靜專。於書無所不讀。一再過。則終身不忘。尤粹於經。格言要義。徃徃皆成誦。講明義理居多。自得其大旨。率本伊洛。而諸儒之說。亦皆參攷互釋。貫穿融液。以會其歸。義有未安者。未嘗苟同。頗為改易。其於象數制度名物。

口講手畫。粲然可觀。以至訓詁義疏。一語之疑。一字之誤。人所不經意者。先生言之甚精。倫類博通。本末該貫。世之號為儒者。未之能及也。每嘆學者好高鶩遠。躐等陵節之病。故其教人。必以致知格物為先。而主之以敬。使人靜坐。收斂心身。整齊莊肅。曰。不如此。無下手處。平居寡言笑。及講學。則樂於開導誘掖。旁引曲譬。疊疊不倦。其詞氣反益寬平。真得講師三昧。雖過時而學者皆言下有省。先生制行甚謹。如蹈規矩。如奉圭璧。終日兢兢。未嘗見有燕惰之色。不欺暗室。不媿屋漏。先生有焉。威如之。教行於家。方嚴不可犯。然其中洞然無城府。處事接物。一出於誠。與人交。篤至周盡。終始無間。人有片善寸長。不啻如自己出。逢人輒稱道。不置。聞言人之惡。則掩耳避去。尤謹於禮。篤老不廢。雖童幼亦與焉。酬對不少忽。不求人之知。而人自知之。於其知之者。亦介然自處。不可親踈。言不及利。徧游諸老。而貧自若。環堵蕭然。無儋石儲。不顧也。所居必痛掃。既一室。執蘭菊。列圖史。布衣蔬食。其間以名教自樂。不知歲年之徂。學成行尊。朋友信之。鄉閭化之。公卿大夫敬之。不得已而仕。白首下位。不沮不戚。惟職業是勤。蓋有為乘田委吏。不卑小官之意。然明練通達。宿於其官者。所不如。故所至有去思。其於文根據淵源。力闕以肆。大抵取諸胸中而書之。凡鈎章棘句。巧



擊悅而窘邊幅者。先生所不爲。詩則薄晚唐。尚王蘇。精深華健。得騷雅意。與大父先人暨朔齋諸老倡酬聯軸。筆法尤通勁逼歐柳。真之名帖中莫辨也。爲金石文者。以不得先生書爲憾。如岷峨樓記。喻隱居墓碣。太白祠堂記。黃庭經等書。皆盡其妙。爭寶藏之。晚自號樗菴老人。有論語幼學說。易集傳。詩會解。漢晉史節通鑑。類名物度數性理指南。信筆錄等書。皆蠅頭細字。每帙不下十數策。藏於家。始先生逾四十不娶。大父以孫明復辟康節之事感之。娶史氏省元元一之孫。子男四人。文壽起潛待省進士。黃中爲外祖。喻氏後。皆力學能文詞。世其家。良老早夭。女三人。長早卒。次在室。次適進士王佐材。先二年卒。孫男三人。見心奎壽。晦老。皆夭。孫女三人。其孤將以甲戌十月庚午奉先生柩葬于平江吳縣至德鄉鳳凰山之坤原。嗚呼。先生師道之立。經學之粹。如胡翼之孫明復。使其稍進于時。必能助成主德。有補世道。而位不配其德。用不究其學。賚志以歿。其所就僅如此。可勝痛哉。某卅角受學先生。先生視之如子。耳提面命。以至成人。雖不敢自謂有得於先生之萬一。猶庶幾未死之年。日聞師訓。以不爲小人之歸。詐意一旦梁壞山頽。嗚呼已矣。無可復言矣。罔極之恩。其何以報矣。患難餘生。志氣頽落。方爲門牆羞。其何能論次先生之平生。而先生遺意。

誼不得辭。顧葬日薄。迺撮言行大畧著于篇。他尚多所遺。無以發先生道德之精蘊。此則某之罪也。立言君子。儻矜而賜之銘。尚有取於斯焉。

## 黃世永

宋楊誠齋集哀辭 乾道乙酉秋七月。予因謁鄉先生武岡史君羅公。公曰。子之友黃世永者死矣。世永之父元授

得州南雄。六月某日。世永自行都侍南雄公西歸。至貴溪逆旅。南雄公疾不起。後一日。世永亦卒。或曰。皆暘也。或曰。世永毀也。予聞之心折。泣且疑。後月餘。得中書舍人周公子克與友生胡季永書。與武岡公之言不異。於是哭之盡哀。世永名文昌。南豐人。自其祖至世永三世。策進士第。而世永策第時年最少。蓋生二十有一也。初主贛之贛縣簿。予時爲州戶掾。予之來去。後於世永者一年。而爲察者三年。一見即定交。世永之高遠深博者。予不能竟也。其學以不媿屋漏爲宗。於文無所不能。能無所不工。嘻笑立成者也。予每往觀其政。則見老穉叢於堂。莫見世永也。披而入。則世永執筆決遣如飛。前者未出。後者入。夜分乃已。世永不煩。民亦不咨。吏亦不欺。初以爲世永勤且嚴。然旋觀三年。如初之觀。竟不見其呵一民。笞一吏。勤者亦懈。嚴者亦窮矣。世永果勤且嚴者耶。紹興戊寅三月。世永白太守去出城五十里。不得行。田里之民環而止之者數十百人。曰。主簿去我。我下



可生矣。相與執輿折山花以簪世永。持濁醪以觴世永。而其老者五六十人。疾走顛之憲臺。列辭以乞留。司憲御史黃公無以遣。則好謂之曰。汝不愛黃主簿乎。皆怒曰。否。曰。留而塞。與去而通。孰愛孰不愛。已而皆曰。然。不  
得已泣而散。予時親見此事。以爲今之守令。罷則先期戒吏民。以卧其轍。此足榮不足榮耶。以今之欺而謂古皆然。若世永於顛之民。乃有此古之所書卧轍云者。又矣乎。使予之不信也。使予無所不信於古之云者。世永  
我雖然。予於世永之事。親見者也。古之書者。又不知其親見否耶。未幾浙水西部使者邵公辟世永秀州崇德縣令。時某令者待崇德次三年矣。適及期而辟書下。世永抗章力辭。士大夫義之。或者曰。矯也。見義則不懦於避。見利則勇於不避。此或者之所賢也。世永得辭其矯哉。世永在都下未調。勢家子有階中人得法從者。臺諫相視不怪。世永袖文書謁御史朱其姓者。責以天下公議。御史怒。未有以發也。會中書舍人張公安國聞世永之風而悅之。曰。天下乃有此士。即薦於朝。得召。世永辭焉。而御史亦言於光堯曰。黃某沽名躁進。世永自是偃蹇江淮間。上之二年冬十二月。以人望起。故大丞相魏國張公於督府而再相之。公至。首薦世永授樞密院編脩官。未赴。公爲羣小擠去。而世永亦復論罷。今二年矣。而遂死耶。嗟乎。哀

哉。世永年止三十有八。而官止左從政郎。而其立已如此。選其年。享其位。以訖其施。其立何如哉。雖然。壽且貴而莫之有立。有立而莫之壽且貴。政使世永自擇。宜何擇也。然則世永可無憾矣。而予猶哀之耶。嗟乎。才珍於天而捐於人。厚一邑而薄天下。吾意當世君子之用心。不宜有此也。不宜有而有焉。則予之哀獨爲吾世永哉。乃書以寄其子樞而爲之辭曰。聖門際天而不可逕。予聚糧以疾趨。古文熄而哇鄭。予獨追而雅諸衆。皆賞其裸而遺其裏。予知全者不在予。仕者謂顛民之囂。予不啻妹邦之夫。何子之仁以莅。予若膝下之乳雛。予惟子之觀。予則未知封屋之迂。沐猴勇而罔覲。予髮上而衡。予舍已躁進而謂子躁進。予宜不曰沽名之非。意世切齒於彼之晚賈。予流涕於子之不晚殂。庸知天之不予祉。予不厚彼之辜。惟師友之恩。紀。予一飯而九其吁。天不予隼而奪予朋。予半其濟而亡艫。決汝漢而東之。予曾足爲予淚之餘。若子之死而不死。予不亦名星日而骨幽墟。





